

1 Corintios

Pablo chënga jacheuayama

1 ¹ Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánbošeyeca, cánÿiñe chë Jesucristbeyeca catšata Sósteneseftaca, ² quem tsbuanácha séntsabiamná tšëngaftanga chë Corinto bëts puebloca Jesucristbeñe ošbuáchiyëngbiana; ndëmuanÿenga Cristo Jesúseftaca Bëngbe Bëtsá tojábiana chabe entšanga ñye chábioye oservënënga, ndëmuanÿenga Bëngbe Bëtsá tojáchembo chabe entšanga chašmotsemnama, chë ñye quem luarama enójuabnaye entšanguentsana luarënënga, Bëngbe Utabná Jesucristbioye tmojtšëmbonëngaftaca, Jesucristo nda yomna Bëngbe Utabná y chëngbe Utabná. ³ Atše séntsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y tšëngaftangbe ainaniñe tšabe ebionana chašmotsebonnama.

Bëngbe Bëtsá Jesucristbeyeca tojama tšëngaftanga ba tšabe bendicionënga chašmotsebonnama.

⁴ Bëngbe Bëtsá tšëngaftangbiana sempre sëndbëtsatschuanaye, er tšëngaftanga cánÿiñe mo canÿacá Cristo Jesúseftaca šmómnyeyeca,

Bëngbe Bëtsá tšëngaftangbeñe tojajuabó, tšëngaftangbe tšabiana. ⁵ Chca Crístoftaca šmómnyeyeca, Bëngbe Bëtsá tojama tšëngaftanga chašmotsebonnama chábensana ñyetsca tšabe soyënga, tšëngaftanga obenana chašmotsebonnama cha jamëse, Bëngbe Bëtsabe soyëngama jóyebuambayama y chë soyëngama chacmésertama. ⁶ Chca, ntšamo cbonjanabuayinacá mo Jesucristbe ndegombre soyëngcá, tšëngaftangnaca ínÿyëngbioye tšabá šmojinÿanyë ndegombre soyënga bëtsemnama, chë ntšamo jtsiyenama. ⁷ Y chca, Bëngbe Bëtsá chabe entšanga inétsatsatnaye tšabe soyënguentšana tondaye quecmochatabuáshebena, Bëngbe Utabná Jesucristo quem luarentše yochtonÿna tescama Bëngbe Bëtsábeñe jtsošbuáchiyëse chašmojtšobátmanëntscuana. ⁸ Cha echanjama tšëngaftanga chábeñe corente chašmotsošbuáchema y ainaniñe bëts añemo chašmotsebonnama, ndayá tšëngaftangaftaca jamama cha yujuabnacá chaojapochocantscuana; chca, chë Bëngbe Utabná Jesucristo ñyetsca entšangbiana tšabá o ndoñe tšabá tmonjamama yochjayana te, ndocná chaondobená jayanana tšëngaftanga ndoñe tšabá šmonjama ca. ⁹ Bëngbe Bëtsá ñyets tempo jtsamana ntšamo tojašebuachenacá, y

cha endmëna nda tcmojánachembo canýiñe mo canýacá chašmotsemnama chabe Uaquíñá Jesucristoftaca, Bëngbe Utabná.

**Choca ošbuachiyëngbeñe
nyetscanga ndoñe cachcá
montsanjuabná**

¹⁰ Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nyetsca bëngbiana yomnama, tšëngaftanga nyetscanga cachcá chašmotsejuabnama, y tšëngaftangbeñe ndoñe más báseftanga canýe soye y ínýenga inýe soye chamuatsjuabná. Y aíñe šmochtsiyena mo canýacá, nyetscanga cachcá jtsejuabnayëse y cachcá jamama jtsebošëse. ¹¹ Jesucristbeyeca atšbe catšátanga, atše chca sënjayana, er Cloebe yebnentšënga šmonjabëuenaye, tšëngaftangbeñe šmojtsepenzenterama. ¹² Ntšamo sëntsichamcá entsemna ndayá tšëngaftangbentšë báseftanga šmojtsichamo: “Atšë Páblëbe ustoná sëndmëna ca”; ínýengna imojtsichamo: “Atšna Apólosbe ustoná sëndmëna ca”; ínýengna: “Atšna Pédrëbe ustoná sëndmëna ca”, y ínýengna: “Atšna Cristbe ustoná sëndmëna ca” imojtsichamo. ¹³ Chca šmojtsamama, jtsóbocanana mo cada básefta ošbuáchiyënga canýe Cristo tmojtsebomncá. ¿Pablo yojamna nda tmojanrucificá tšëngaftangbe tšabiana? ¿O tšëngaftanga uabáinënga šmomna, atšë jótšëmbonëse, tšëngaftanga atšbe ústonënga bëtsemnama? ¹⁴ ¡Bëngbe Bëtsá sëndbëtsatschuanaye atšë ndocná tšëngaftanguentšá tijanábayama; nýe Crispo y Gáybioye aíñe! ¹⁵ Chca, ndocná quenátobena jayanana, atšë jótšëmbonëse uabainá cha tojanoquedá

ca, mo átšbeñe ošbuáchiyënga cuaftsemncá. ¹⁶ Estéfanasbe pamillentsëgnaca sënjanëbaye, pero ndoñe quetsatabouínýna inýa tijanábayama. ¹⁷ Er Cristo ndoñe chešnatanichmó ínýenga jubáyama, ndayá chë chabe tšabe noticiëngama entšanga jábuayenama. Ndoñe chešnatanichmó chë soyënga jayanama, corente osertana entšangbe soyënga jtsichámëse; chca, entšanga Crístbeñe chamotsošbuáchema, ndoñe chë atšbe osertánanentšana palabréngama, sinó nýe chë buayenánama, Cristo cruzoca bëngbiana tojanóbanama.

**Crístbeñe yomna Bëngbe Bëtsabe
obenana y osertánana**

¹⁸ Quem buayenánana, Cristo entšangbiana cruzoca tojanóbanama, chë pochocánënga jtsemnama tmojtsajnéngbioye jtsinýanana mo ndoñe corente juabna bomnëngbe soycá; pero bëngbiana, chë Bëngbe Bëtsá nyetsca tescama šochjátsebacangbiamna, quem buayenánana jtsinýanýnayana Bëngbe Bëtsabe obenana. ¹⁹ Ntšamo Bëngbe Bëtsá chabe uabemana palabrénguñe tojanayancá:

Atšë chanjama chë
tša osertánëngbe
osertánana tondayama
chaondëtsošservénama;
y chanjama chë ba soyëngama
osertánëngbe osertánana
tondayama chaondëtsámanama.

²⁰ ¿Ntsachetšá yojtsámama chë tša osertaná y chë puerte uatsjinýená tbojayana soyënga? ¿Ntsachetšá yojtsámama chë tša tšabá chë soyëngama juabnayá, morscá, y ínýengaftaca enatsëtsnaye ora chëngbe ayëñjanayá tojayana soyënga? Ndegombre Bëngbe Bëtsá tojinýanýe,

chë quem luarentša bëtš osertánanaca tmojayana soyënga tondaye yonduámanama. ²¹ Bëngbe Bëtšá, nÿets osertánana bomná quetsomñecá y puerte tšabá jtsejuabnayëse, ndoñe tonjanalesenciá quem luarentša entsãnga cha chamotsábuatmama, chë quem luarentšënga tša osertánënga tmojánayana soyëngama. Chamna, cha tšabá tbojanínÿnana chábeñe ošbuáchiyënga játsebacana chë bënga fsëndabuayiná soyëngama, masque ínÿengbioyna mo ndoñe corente juabna bomnabe soycá jtsinÿanana.

²² Judiënga tša jtsebošana y Bëngbe Bëtšábioye jtsotjanañana bëtš soyënga chaomama, chabe obenana jinÿanÿiyama; y ndoñe judiëngna tša jtsenguayana chë puerte osertánëngbe soyënga jtsetatšëmbuama. ²³ Pero bëngna Cristbiana entsãnga fsëndabuayiná, chë ínÿënga tmojanrucificabiana. Quem buayenánana chë judiënga ndoñe tšabá ntjéuénanana. Y ndoñe judiënga mondbëtsejuabnaye chca yomna mo canÿe ndoñe corente juabna bomnabe soycá ca; ²⁴ pero bëngbiana, nÿetscanga Bëngbe Bëtšá chabe entsãnga chamotsemnana šojáchembëngbiamna, masque judiënga o ndoñe judiënga, Cristbeñe endmëna nÿets Bëngbe Bëtšabe obenana y osertánana; ²⁵ er ndayá Bëngbe Bëtšá tojanmca, Cristo cruzoca chaóbanama jalesénciase, banga jtsinÿanana mo canÿe ndoñe corente juabna bomnabe soycá, pero ndegombre endmëna canÿe puerte más osertaná tojama soye, lempe ntšamo entsãnga imotatšëmbuama. Y ndayá cha tojamcá masque bångbioye jtsinÿanana mo canÿe tondaye obenabe soycá, ndegombre chë soye jtsinÿanÿnayana Bëngbe Bëtšá puerte más obenana

yobomnana, nÿets obenana ntšamo entsãnga imobomnana.

²⁶ Jesucristbeyeca atšbe catšátanga, šmochtsejuabnaye ntšamo yojamnama, Bëngbe Bëtšá chabe entsãnga chašmotsemnana tcmojánachembo ora. Tšëngaftangbentšë nÿe báseftanga tša osertánënga šmojamna, ntšamo chë osertánana bomnënga imomnama entsãnga mondbetsejuabnaye; y báseftanga šmojamna becá mando atšetanënga o uámana pamillentsënga. ²⁷ Pero Bëngbe Bëtšá, quem luarentšë ndoñe tša osertánënga tojanabacacá, chca, cha jamama chë quem luarentša soyëngama tša osertánënga chamotsëuatjama; y cha, quem luarentšë ndobenënga tojanabacacá, chca, chë obenana bomnënga chamotsëuatjama. ²⁸ Bëngbe Bëtšá quem luarentšana tojanbocacá ndayá tondaye yonduamancá y ndayá ínÿënga imuabotencá; tojanbocacá ndayá tondaye yonduamancá, chca, ndayá quem luarentšë tša uamancá tondaye chaondëtsámanama. ²⁹ Y chca, Bëngbe Bëtšabe delante ndocná quenátobena jayanana tša bëtšá cha yomna ca. ³⁰ Bëngbe Bëtšá tojama bënga Crísoftaca cánÿiñe mo canÿacá jtsemnëse chamotsiyenama, y chábeyeca tojama bënga chamóyëngacñama chabe osertánana bomna soyënga; chábeyeca tojama bënga tšábënga chabe bominÿiñe chamotsemnana, chabe entsãnga jtsemnana chamobenama, puerte tšábënga cach Bëngbe Bëtšacá, y atsebácanënga chamotsemnana. ³¹ Y chca, ntšamo Bëngbe Bëtšabe uabemana palabrënguinië endayancá: “Nda tojtseboše jayanama cha canÿe uamaná yomna ca, chamna más tšabá cha bontsemna jayanama Bëngbe Utabná puerte uamaná yomna ca.”

**Ntšamo Pablo Cristo
crucificanábiamu chënga
tojanabuayená**

2 ¹Pero, Jesucristbeyeca atšbe catšátanga, Bëngbe Bëtsabe ndegombre soyëngama tšëngaftanga jábuayenama sënjána ora, chca sënjanma ndoñe chë uámanëngbe palabréngaca, ni chë tša osertánëngbe palabréngaca. ²Y tšëngaftangaftaca sënjamna ora, ndoñe quetstétseboše nye ndayínnaca jatsjuabnayana, ndayá nye Jesucristbeñe, nda bëngbe tšabiamu tmojanrucificá. ³Atše tšëngaftangbeñe sënjamna, mo canya ba soyënga jamama ndobenacá, y mo canya puerte auatjacá y tbojtsengmëmñacá, chabe trabajo jamama ndoñe jobenayama juabnaye causa. ⁴Ntšamo cbonjanëtsëtná y cbonjanabuayinacá atše sënjanoyebuambá ndoñe chë tša osertánëngbe palabréngaca, tšëngaftanga jáyëñjanama chiñe chašmotsošbuáchema; pero añe tbonjanayëñjaná, Bëngbe Bëtsabe Espiritu y chabe obenana tšëngaftanga jinyanýiyëse, ⁵chca, tšëngaftanga Bëngbe Bëtsabeñe chašmotsošbuáchema, ndoñe nye entsangbe osertánanaca, sinó Bëngbe Bëtsabe obenanama.

**Uámana Espiritbeyeca, Bëngbe
Bëtsá jamana entsanga cha
chamotsábuatmama**

⁶Pero, chë ya tmojashjáchënga Bëngbe Bëtsabeñe puerte jtsošbuáchiyama y chabe soyëngama corente jtsosertánama, chëngbeñe bënga fchandóyeububaye becá osertánana bomna soyënga. Pero ndoñe quenátsmëna quem luarentša entsanga quem tempo

mondbëtsichamo soyënga, ni mora quem luarentše amëndayëngbe soyënga, ndëmuanýënga ndoñe bën y ndocna obenana bomñënga mochanjëftsoquëda. ⁷Y añe, chë bënga fsëndoyebuambná osertánana bomna soyënga endmëna chë Bëngbe Bëtsá quem luarentša entsangbioye baytentscuana ndoñe tonjaninýanyé soyënga, y chca, entsanga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënama, quem luare cabá cha ndëma ora, y yojanjuabná, chë soyëngaca bënga mochtsanobena puerte bëtsëtsanga y uámanënga jtsemnana, cháftaca chë nyetsca tescama yomna tšabe vida jtsebomnama. ⁸Quem Bëngbe Bëtsabe puerte osertánana bomna soyënga endmëna canye soye ndayá quem luarentša amëndayënga ndoñe ntsësertánana, er chënga añe matëñjanësértase, Bëngbe Utabnábioye chënga ndoñe matmëñjancrucificá, Bëngbe Utabná nda puerte bëtsá y uamaná yomna. ⁹Bëngbe Bëtsabe uabemana palabrénguine quem Bëngbe Bëtsabe puerte osertánana bomna soyëngama mëntšá endayana:

Cha imobobonshánëngbiama
Bëngbe Bëtsá tojaprontá
soyënga,

ndocná tonjinýe, ni tonjouena y ni
mo tonjajuabó ca.

¹⁰Pero Bëngbe Bëtsá quem soyënga chabe Espiritoftaca bënga šojanýanyé, er chë Espiritu lempe jtsetatšëmbuana, chë Bëngbe Bëtsabe soyëngama puerte totcá josértama yomna soyëngámñaca.

¹¹Entšángbeñe ndocná quenátobena jtsetatšëmbuana ndayá entsabe ainaniñe tomnama, sinó nye chë entsabe espiritu, chë chábeñe yomná. Cachcá, nye Bëngbe Bëtsabe Espiritu

jtsetatšëmbuana ndayá Bëngbe Bëtsá tojuabnacá. ¹² Y bëngna, Bëngbe Bëtsábíocana Espíritu tmojóyëngacñe, ndoñe canye quem luarentša espíritu, chca, bënga chašósertama chë Bëngbe Bëtsá tojama bënga chamotsebomna soyëngama, bëngbe tšabiama cha jtsejuabnayëse. ¹³ Bënga chë soyëngama fsëndoyebuambná, ndoñe chë quem luarentša entsãngbentšana tifjuatsjinye osertánana bomna palabrëngaca, sinó chë Bëngbe Bëtsabe Espíritu šojabuatambá palabrëngaca. Chca, Bëngbe Bëtsábíocana soyëngama bënga fsëndabuayiyiná, Bëngbe Bëtsabe Espíritbentšana yóbocana palabrëngaca, chë Uámana Espíritu ainaniñe imobomnéngbioye.

¹⁴ Bëngbe Bëtsabe Espíritu ndoñe tondbomná, chabe ainaniñe ndoñe ntjóyëngacñana chë Bëngbe Bëtsabe Espíritbiocana yóbocana soyënga, er chë entsábíama chë soyënga jtsemnana mo canye ndoñe corente juabna bomnabe soyëngcá, y chabosertama cach ndoñe ntsoberana. Chca endmëna, er entsá jobenayana quem soyëngama jtsetatšëmbuama y josértama, nýe chabe ainaniñe chë Uámana Espíritu tbojtsájabuachañëse. ¹⁵ Pero nda aíñe chë Espíritu tbojtsebomna jtsobenerana nýetsca soyënga tšabá jinýama chabosertama, y ndocná chë Espíritu ndoñe tbondbomná ntsoberana josértana ntšamo chë Espíritu bomná yomnama. ¹⁶ Er Bëngbe Bëtsabe uabemana palabrënguiñe mëntšá endayana: “Ndocná quenátabatma Bëngbe Utabnabe juabna, chábioye jabuátëmbama chaotsobenerama ca.” Pero bënga, chë ošbuáchiyënga, mondobena jajuaboyana ntšamo Cristo yojuabnacá.

**Jatrabájama enutanánënga
Bëngbe Bëtsá jaserviama**

3 ¹ Pero, Jesucristbeyeca atšbe catsátanga, atše ndoñe

chiyatanobená jóyebuambayama, mo tšëngaftanga chë Uámana Espiritoftaca mandánënga šmojatsmëncá, sinó nýe cachënga tšabá jtsomñama juabnënga bomna entsãngbioycá, mo basetemëngbioycá, Cristbe soyëngama josértama ndobenënga. ² Mo canye bebmacá, chabe basetémbioye nýe létšiyë jafšiyana y paselo jabmuánama sananga, chë básetema chcana jasama cabá ndoñe ntsoberana causa, cachcá, atše cbonjanabuatambá Bëngbe Bëtsabiama nýe chë más paselo josértama soyëngama, y ndoñe inye soyënga más totcá josértama soyënga, er tšëngaftanga ndoñe quešmënjatobena chca soyëngama josértana. Y ni mora, tšëngaftanga quešmátobena Bëngbe Bëtsabe soyëngama josértana, chë josértama más totcá yomna soyëngama; ³ er tšëngaftanga cabá šmojtsama, nýe ntšamo cach tšëngaftanga tšabá jtsomñama tšëngaftangbe juabnënga yomncá. Y tšëngaftanga ínýëngaftaca cabá yapa šmojtsenántšaboše y nýe ínýëngbioye jayénjanama soyënga šmojtsamëntscuana, tšëngaftanga šmojtsama nýe ntšamo cach tšëngaftanga tšabá jtsomñama tšëngaftangbe juabnënga yomncá, y chca, tšëngaftanga šmojtsiyena mo chë nýe quem luarama enójuabnaye entsãngcá. ⁴ Er canya: “Atšë Páblëbe ustoná sëndmëna ca”, y ínýana: “Atšë Apólosbe ustoná sëndmëna ca” tojayana ora, chca jtsamana mo chë nýe quem luarama enójuabnaye entsãngcá.

⁵ Tšëngaftanga chca šmojamama, atšë šontsemna tšëngaftanga játjayana: ¿Ndayá Apolos yomna? ¿Ndayá Pablo? Chatna co nýe Bëngbe Bëtsábioye oservénata bondmëna, ndátbeyeca tšëngaftanga Jesucristbeñe

šmojtsošbuaché, y bëndata cada ona fsënjama chë Bëngbe Bëtsá šojanÿanyé trabajo. ⁶ Atšna, mo nda jajañe jénaye cuafjuatbontsacá, tšëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguñe bėjaye cuaftebuešcñacá, enjantrabája cach atše sënjanbojatsé chiñe; pero Bëngbe Bëtsá, ntšamo matatémënga chauájuaama endbetsamcá, tojama banga tšëngaftanguentše Jesucristbeñe chamotsošbuáchema. ⁷ Ntšamo, chë jená y chë matënguñe bėjaye buešcñayá ndoñe yapa ntšamanana chiñe shajuanënga chaóboconama, nÿe Bëngbe Bëtsá aíñe, cachcá, nda Bëngbe Bëtsabiama entšanga jábuayenama trabajo tojajobatsé y nda chentšana tojášhango cach trabajuiñe jóntšama, ndoñe ntjamana entšanga Jesucristbeñe chamotsošbuáchema; nÿe Bëngbe Bëtsá chca jamana. ⁸ Chë jená y chë matiñe bėjaye buešcñayá cach trabajuiñe jtsentšénana, y chatna mo trabajayatcá jtsámanana; y cada ona juácana ntsamo chabe trabajo tomncá.

⁹ Bëndata fsëndmëna trabájayata Bëngbe Bëtsabiama oservëniñe, y tšëngaftanga šmondmëna mo Bëngbe Bëtsabe jajañcá, ndayentše cha yojtseboše tšabe jaja saná chaóboconama, y šmondmëna mo chë cha yojtsejebuana bëts yebncá. ¹⁰ Er Bëngbe Bëtsá atšbe tšabiama jtsejuabnayëse, chë trabajo šojabonyé, y atše mo canÿe puerte tšabe jebuanacá, canÿe yebna ndayiñe chaotsécuatjonama tojapormacá, sënjanbojatsé chë trabajo, Bëngbe Bëtsabe soyëngama tšëngaftangbeñe jábuayenama. Chentšana inÿa, mo chë inÿe yebna jebuaná tojajobatsé jajebuama chiñe más jatsjebuama nda

tojatontšecá, cach atše sënjanbojatsé trabajuiñe tojanontsé. Pero cada ona botamana chaotsantješna ntšamo chë trabajo yojtsamama. ¹¹ Mo chë cánÿabentšana inÿe trabajayacá, ndoñe ntsobenana chë yebna jajebuama tojanbojatsé cha chë yebna chaotsécuatjonama tojanpormañe inÿe soye cachcá chaoservema jatspórmana, cachcá, ndocná chaondëtsabatambá inÿe soyënga, nÿe ntšamo Jesucristbe soyënga yomncá aíñe, chë ntšamo atše natsana sënjanabuatambacá. ¹² Chë Jesucristbiama más uamana soyënga buatëmbayá jtsemnana mo chë castellano, midio y inÿe uamana soyëngaca yebna jebuanacá; y chë Jesucristbiama nÿe nduámana soyënga buatëmbayana mo chë niñëbenga, butsjajësha y tëshenjñesheca yebna jebuanacá. ¹³ Y Cristo chaojésabo te, Bëngbe Bëtsá echanjínÿanÿiye ntšamo cada cánÿabe trabajo yomnana. Cha chë te íñesheca chca echanjínÿanÿiye, y chë íñesheca, Bëngbe Bëtsá echanjinÿe y echanjínÿanÿiye ndaye trabajo cada ona tojamama. ¹⁴ Ntšamo cada cánÿabe trabajo yojtsámanama jtsetatšëmbuama Bëngbe Bëtsá chaojinÿe ora, cha chabe trabajo aíñe yojtsámana ca queojayanëse, chë tšabe trabajayá Bëngbe Bëtsábiocana canÿe uacanana soye echanjóyëngacñe, er cha jtsemnana mo canÿe entšacá, nda canÿe yebna tojtsejebuana jtsejuinÿyama ndoñe paselo tondmëna soyëngaca. ¹⁵ Pero chë te cánÿabe trabajo nÿe batšá yojtsámanama Bëngbe Bëtsá íñesheca chaojinÿanÿeyese, chora chabe trabajo echántsemna mo chë jtsejuinÿyama paselo tomna soyëngaca jebuanabe soyëngcá, chentšana nÿets yebna jtsejuinÿana. Chë jebuaná jtsachana, pero chabe trabajo lempe jobuétšana. Cachcá, chë

Bëngbe Bëtsabiana trabajo tojtsamá, nÿe batśá oservena trabajo, cha echanjobenaye atsobaná jtsemnana, masque lempe ntśamo tojamcă tondaye queochaisoquéda.

¹⁶ ¿O tşëngaftanga ndoñe şmondétatşëmbo nÿetscanga cânÿiñe Jesucristbeñe oşbuachiyëngcă, mo chë Bëngbe Bëtsabe bëts yebncá şmommnana, y tşëngaftanguentşe Bëngbe Bëtsabe Espiritu yomnana? ¹⁷Nderado nda tojama, tşëngaftanga nÿetscanga cânÿiñe Jesucristbeñe oşbuachiyëngcă jtsemnana chaotsopochocama, Bëngbe Bëtsá chábioye bochantsepochóca, er chë Jesucristbeñe oşbuachiyëngcă cânÿiñe imomnënga, jtsemnana mo chë Bëngbe Bëtsabe bëts yebncá, chabe entşanga nÿe chábioye jaserviama; y tşëngaftanga chca şmondmëna.

¹⁸Ndocná cachá chaondëtsenoíngña. Nderado nda tşëngaftanguentşá tojtsejuabná cha tşa osertaná yomna ca, ntśamo quem luarentşa entşanga mondbëtsejuabnaye ntśamo canÿe puerte osertaná inëtsemnana, cha bontsemna jóbemama mo canÿe ndabiana quem luarentşa entşanga chamuayana cha corente juabna ndbomná yomna ca, chca, ndegombre corente osertaná jtsemnana chaobenama. ¹⁹Er chë quem luarentşa entşanga tşa osertánënga imotátşëmbo soyënga, Bëngbe Bëtsabe bominiñe yomna mo chë corente juabna ndbomnabe soycá. Bëngbe Bëtsabe uabemana palabrenguiñe mëntśá endayana: “Bëngbe Bëtsá chë tşa osertánënga jáyëñanana, ndayá cachënga inÿenga jáingñama tşa osertánanaca tmojtsama soyëngaca ca.” ²⁰Y mëntşánaca endayana: “Bëngbe Utabná endétatşëmbo chë tşa osertánëngbe juabnënga tondayama

yondoservënama ca.” ²¹Chíyeca, ndocná chaondëtsichamo corente uamaná yomna ca, ndaye entşabe ustoná tomnana, er lempe ntśamo şmobomncá, Crístbeñe oşbuáchiyënga bëtsemnana, tşëngaftangbe tşabiana endmëna, y nÿetscanga chë tcmojujabuachëngnaca cachcă.

²²Lempe tşëngaftangbe soye endëtsumñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentşe yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yochtsemncánaca. ²³Y tşëngaftanga Crístbenga şmondmëna, y Cristna Bëngbe Bëtsábia.

Jesucristbe ichmónëngbe trabajo

4 ¹Entşanga entsamna bëngbiana jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo bomnënga, chë Bëngbe Bëtsá baytentscuana entşángbioye ndoñe tonjaninÿanyë, pero mora aíñe tojinÿanyë soyënga jtsabuátambayama trabajo bomnënga. ²Chca, nda canÿe trabajo tojtsebojanÿabiamna, chabe mandayá jtsobátmanana cha aíñe tşabe palabra bomná chaotsemnana. ³Atşbe bariëna, tondaye quenátamana, ntśamo tijamcă şmojinÿe y ndoñe tşabá tijama ca şmojayanëse, o inÿe entşanga cachcă tmojayanëse mo canÿe tribunaliñcă. Ni cach atşe ndoñe chca quetsátama, jtsetatşëmbuana ntśamo atşbe trabajuama tijayancá ndegombre tayojtsemnana. ⁴Atşbe ainaniñe ndocna juabna quetsátsbomna atşe chaşuyanama bacna soye tijama ca, pero chca ndoñe quenátayana, ndegombre Bëngbe Bëtsabe delante ndocna bacna soye ndbomná atşe stsemna

ca. Er Bëngbe Utabná endmëna nda atšbe trabajo yonýa y nda ndegombre yobena jayanama atše tšabá o ndoñe tšabá tijamama. ⁵ Chíyeca, tšëngaftanga ndoñe quecmátamna jinýana y jayanana ínýenga ndoñe tšabá tmonjama ca, chë nýa chama tempo cabá ndóshjanguëntscuana, Bëngbe Utabná chama chaojésabo ora. Cha chaojésabo ora, puerte tšabá echanjínýañiye chë iytëmencá yomna soyëngama, mo ibetiñe cuaftsemncá, y botamana echanjínýañiye, mo binýniñcá, ndayá jamama nýe chëngbe ainanoca entšanga tmojajuabocá. Y chora Bëngbe Bëtsá cada entšabiama echanjayana tšabe soyënga, ntšamo tbojtsomerecencá.

⁶ Jesucrístbeyeca atšbe catsátanga, chë soyëngama tšabá jábuayenamna, atše sënjama ntšamo Apolos y atše tifjatrabájama botamana chašminýama, y chca sënjama tšëngaftangbe tšabiama, ntšamo bëndata tifjamentšana chašmuatsjínýama jtsiyenana nýe ntšamo Bëngbe Bëtsabe uabemana palabrënguiñe iuayancá, y ndocná tšëngaftanguentšá canýe entšabiama chaotsenábotamnaye, y ínýabiama ndoñe tšabá chauátoyebuambnama. ⁷ Er, ¿nda chë ínýengbiama más uámanënga tšëngaftanga cmojtsabiamná? ¿Y ndayá šmobomna, Bëngbe Bëtsá ndoñe tcmontjatsatá soye? Y tšëngaftanga chca chašmotsebobmnama cha tojanmëse, ¿ndáyeca šmojtssenabotamná mo Bëngbe Bëtsabe tšetana soyënga ndoñe tontsemncá, y nýe cach tšëngaftangbeyeca šmojonýencá?

⁸ Tšëngaftanga šmojtsejuabná ya lempe ntšamo cmëjabotcá Bëngbe Bëtsábíocana šmojtsebobmna ca, y lempe ntšamo jtsebošama šmojtsebencánaca ca. Mo reyënga

cuaftsemnëngcá cmojtsabiona, bëngbentšana tondaye ntsëjbotocá. Malaye tšëngaftanga mo reyëngcá šmojtsemna, Crístoftaca cánýiñe jtsemándayëse; chca, bëngnaca tšëngaftangaftaca jtsemnama, cánýiñe jtsemándayëse. ⁹ Atše šontsinýana, bënga chë Cristbe ichmónënga Bëngbe Bëtsá šojábíama mo chë nyëtscangbiama más nduamanëngcá, mo chë jóbanama yojtsamna entšangcá. Nyëtscanga chë Bëngbe Bëtsá tojábíamënga bëngbioye jtsënyáyana mo ndoñe cachca entšanga fstmncá; angelënga y entšángnaca cachcá bëngaftaca montsama. ¹⁰ Bënga, Cristbiama oservena causa, quem luarentša entšangbiama fsëntsinýna mo corente juabna ndbomnëngcá; chë cuenta, tšëngaftanga šmojtsejuabná Cristbe soyëngama corente osertánënga šmomna ca. Bënga fsëndmëna chë entšangbe bominiñe ndocna obenana ndbomnënga; y tšëngaftangna šmojtsejuabná puerte obenana bomnënga šmomna ca. Tšëngaftangbioye ínýenga puerte uámanënga y bëtšétsanga jtsabíamnayana, pero chënga bëngbioye jtsébuayënjana. ¹¹ Y méntscóñama, bënga šontsabuashebebiana saná, ndayá jofšiyama y entsáyá. Entšanga bëngbioye bacá jtsaborlánana, y tondaye yebna queftsátsbobmna. ¹² Y bënga puerte jabuache fsëndëtrabája cach bëngbe cucuatšëngaca. Entšanga šojóyanguango ora, Bëngbe Bëtsá fchandbëtseimpadana cha chaoma chënga tšabe bendicionënga chamotsebobmnama. Bënga chamosufrima ínýenga tmojtsama ora, bënga chë soye fchandbëtsoyoyaye. ¹³ Inýenga bëngbiama bacá tmojtsoyebuambná

ora, jtsababuányeshanése fsënduamana jtējuana. Quem luarentša entsangbe bominyiñe bënga jtsemnana chë puerte nduámanënga, mo chë quem luarentša basurëshëngcá, chë quem luarentša entsanga tondayama ndoservënënga, mo chë quem luarentša tsengacá; y chca endmëna mëntscoñama.

¹⁴ Quem soyënga ndoñe quecbatëbuabiamná tsëngaftanga chašmotsëuatjama, sinó ndayá jábuayenama mo cach atšbe basengbioycá, atšbe bonshánënga. ¹⁵ Er masque tsëngaftanga mallajta abuátambayënga chašmotsóboñe, jacúntama ntjobenaycá, Cristbiam chacmotsabuátambama, ndoñe banga quešmátabamna tsëngaftangbiam mo taitangcá, Cristo Jesúsbeñe jtsošbuáchiyama tcmojanéjabuachama. Nye atše sëndmëna mo taitacá tsëngaftangbiam, mo ošbuachiyëngcá, er atše natsana tcbonjanabuayená chë tšabe noticiënga Jesucristbiam, y tsëngaftanga chiñe šmotsanošbuaché. ¹⁶ Chíyecna, cbontsaimpadana ntšamo atše tijamcá chašmotsamama.

¹⁷ Chama Timoteo tsëngaftangbioye sentsichamná, atšbe bonshaná, canye añe tšabe palabra bomná; Bëngbe Utabnábeñe tojanošbuachéyeca, atše Cristbiam sënjanbuayiná ora, mo atšbe uaqiñacánaca cha endmëna, ntšamo chabe ošbuáchiyana yomnama. Cha echanjama tsëngaftanga chašmuatenójuaboma ntšamo atše tsëngaftangbeñe tsjoyenama, Crístbeñe ošbuachiyacá, ndayama atše nyets tempo ošbuáchiyënga sëndbetsabuatabaycá nyets luare ošbuáchiyënga enefjuanache. ¹⁸ Tsëngaftanguentše báseftanga ya šmojatsjuabná puerte uámanënga šmojtsemna ca, er šmojtsejuabná atše stsautja tsëngaftangbioye jama

jányama ca. ¹⁹ Pero Bëngbe Bëtsá chašojalesenciase, sentsobátmana betesco tsëngaftangbioye jama jányama. As chjinye ntsache obenana imobomna chë Bëngbe Bëtsabe entsangcá jtsiyenama tša uámanënga imomna ca juabnayënga, y ndoñe nye ntšamo jayanama imobencá. ²⁰ Er Bëngbe Bëtsá canye ošbuachiyabe ainaniñe tojtsemánda ora, chca jtsinýnana ndoñe nye ntšamo tojtsichámuama, ndayá Bëngbe Bëtsabe obenana chábeñe tojtsemnama. ²¹ ¿Tsëngaftanga ndayá más šmattseboše: atše chayá tsëngaftangbioye jauacánama, o chayá tsëngaftangbioye jányama puerte bonshanánaca y ntsetsatjaycá tsëngaftanga jauyanama?

Ndayá cuanjama canye boyabása shembásaftaca bacna soye amáftaca

5 ¹ Ndegombre nyets luariñe entsótatšëmbo tsëngaftanguentše yojtsemna canya, shembásaftaca bacna soye amá, y ntšamo cha yojtsamcá puerte bacna soye yojtsemna; ni chë Bëngbe Bëtsábioye nduabuátmënga chca ntsamana: canye entšá cachabe mamamnáftaca bacna soye yojtsama. ² Y tsëngaftanga cabá šmojatsjuabná corente tšábënga šmomna ca, masque chca tsëngaftangbeñe yojtsopasánëse. Tsëngaftanga cmontsamna puerte ngménaca jtsemnana, tša uabouana soye cha yojtsama causa. Canye entšá chca tojamáftaca, tsëngaftanga cmontsamna jamana cha ndoñe más tsëngaftangaftaca chaondenútanama mo ošbuachiyacá. ³ Y atšna, masque tsëngaftangaftaca choca ndoñe quetsátmëna, atšbe juabna choca tsëngaftangaftaca entsemna; y chca atšbe espíritoca séntsemnayeca, Bëngbe Utabná šojëftsanatšetá mándoca, sënjajuabó y

séntsetatšëmbo ntšamo tšëngaftanga cmojtsamnama, chë entšá chca tojamáftaca. ⁴Tšëngaftanga chašmojénefjna ora, chentše atšbe espíritoca tšëngaftangaftaca atšbe chántsemna, y atšbe espíritu chentše echántsemna Bëngbe Utabná Jesusbe obenánaca. ⁵Y chora tšëngaftanga cmontsamna jamándana chë entšá ya ndoñe más tšëngaftangaftaca mo ošbuachiyacá chaondenútanama, mo Satanasbe cucuatišne cha cuafjaboshjoncá, chca, chë quem entšá nye cachá tšabá jtsomñama juabnënga chaotsopochocama, y chca, Bëngbe Utabná cachiñe chaojésabo ora, chabe espíritu atsbočaná chaotsemnama.

⁶Tšëngaftanga šmojtsejuabná puerte tšábenga y uámanënga šmomna ca, pero šmojtseleséncia canya tšëngaftanguentše chca chaotsamama. Chca ndoñe tšabá quenátšmëna. Tšëngaftanga ya šmondétatšëmbo, ntšamo chë nye batšá levadura endbama, nyets arninýá chauábochema; cachcá, tšëngaftanguentše canya tša bacna soye chca tojama ora, nyetscangbiama ndoñe tšabe soyënga jóbocnana. ⁷Chíyeca, tšëngaftanga cmontsamna, chca uabouana bacna soye tojamá jtabocnana, cha ya ndoñe más tšëngaftangaftaca mo ošbuachiyacá chaondenútanama; y chora tšëngaftanga šmochántsemna mo tsëm arninýacá, ndocna levadúraca, chë bacna juabnëngaca ya ndëmandánënga šmojtšémnayeca. Ndegombre tšëngaftanga chca šmondmëna, er Bëngbe Bëtsá tojama tšëngaftanga tsëm vida chašmotsebmoma. Bashco fiesta ora, oveshá tmojanóba, Israeloca entšanga perdonánënga chamotsemnama. Cachcá Cristo, mo chë oveshacá, tojanóbana bacna

soyënguentšana bënga játsebacama.

⁸Ntšamo chë judiënga chë fiesta ora mondbamcá, nyets levadura ojamnana cachcá jonýayana, cachcá, bënga šontsamna jtsajbanana oyenana bacna soyënga ínëngbiama jamama jtsebošëse, y ndaye bacna soye jtsamëse, ntšamo tempo imojanamcá. Ntšamo chë judiënga chë fiestiñe nye levadúraca ndëpormana tandëse mondbetsesaycá, cachcá, bënga šontsamna jtsiyenana nyetsca soyënga ainaniñe ndocna bacna juábnaca jtsamëse, y ndegombre yomncá jtsóyebuambnyëse y jtsamëse.

⁹Chë inye atšbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chašmondëtsencuénta ca. ¹⁰Y chca ndoñe quetstétseboše jáuyanana nya tondayama chašmondëtsoyëbuambná nyetsca chë quem luarentšënga boyabása o shembásaftaca bacna soye amëngaftaca, chë nye cachëngbiama bëtscá soyënga jtsebmomna tša bošëngaftaca y atbëbanëngaftaca, y chë cachëngbe pormana soyënga diosënga yomnma jtsejuabnyëse adorayëngaftaca ca; er nya chca jamamna, tšëngaftanga cmattsamna quem luarentšana jéftsebočanana. ¹¹Ntšamo chora sënjanayancá endmëna ndayá tondayama ntsencuéntayana, chë Crístbeñe ošbuachiyá yomna ca tojayanáftaca, y boyabása o shembásaftaca bacna soye tojtsama, o nda nye cachabiama bëtscá soyënga jtsebmomna tša tojtseboše, o chë cachabe pormana soyënga diosënga yomnma jtsejuabnyëse tojtsadorana, o yapa tojtsayatsená, o yapa tojtsetmó, o tojtsatbëbana. Chca entšàngaftacna, ni mo šmuatjótbema chëngaftaca cánýiñe jasama. ¹²⁻¹³Atšë

ndoñe quešnátsmëna jayanana chë ndoşbuáchiyënga, chë béngaftaca ndoñe mondbénutananga, aíñe o ndoñe tşabá tmonjamama. Bëngbe Bëtsá echántsemna nda chëngbiama yochjayana ntşamo tmojamcá tşabá o ndoñe tşabá bétsemnama, tşëngaftanga ndoñe. Ndegombre nÿe chë oşbuáchiyënga tşëngaftangaftaca inménutanangbiama cmontsamna chca jayanana. Chcasna, şmochjama ntşamo Bëngbe Bëtsabe uabemana palabrënguñe endayancá: “Tşëngaftanga cmontsamna, chca bacna soye amá tşëngaftangbentşana jtabocnana ca.”

Oşbuáchiyënga jendemándama tojtsemna ora

6 ¹Canÿe tşëngaftanguentşá oşbuachiyá inÿe oşbuachiyabiama canÿe demanda tojtsebmna ora, ¿cha nanjá chë ndoşbuáchiyënga mandadéngbioye chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entşángbioye nanjá chabe demanda chamouenama? ²Tşëngaftanga ndegombre şmondétatşëmbo, Bëngbe Bëtsabe entşanga mochjayanama quem luarentşa entşangbiama tşabá o ndoñe tşabá tmonjamama. Y chënga quem luarentşa entşangbiama chca jayanama tmojtsobenëse, ¿ndoñe montsobena más base soyëngama chca jayanama? ³Tşëngaftanga ndegombre şmondétatşëmbo chë angelëngbiámnaca tşabá o ndoñe tşabá tmonjamama bënga mochjayanama. Chcasna, bënga más jtsobenana chë quem luarentşe jëftsiyenama soyëngama chca játayanana. ⁴Y chcase, tşëngaftangbeñe chca demandënga chë quem luarentşe jëftsiyenama soyëngama tojtsemna

ora, ¿ndáyeca şmatjátëbuayana chë oşbuáchiyëngbiama tondaye tmontsámama entşanga, chë soyënga chamojandmanama? ⁵Chca sënjayana tşëngaftanga chaşmotsëuatjama: ¿O tşëngaftanguentşe ni mo canÿa yondmëna corente osertaná, oşbuachiyëngbeñe demandënga chaojandmanama? ⁶Pero ndoñe chca: oşbuachiyëngbeñe demandënga tojtsemna ora, mandadéngbioye jana chë soyënga chamojandmanama. Y chca jamana ndoşbuáchiyënga mandadëngaftaca.

⁷Y tşëngaftangbeñe nÿe demandënga jájandmanama tojtsemna ora, tşëngaftangbiama ya canÿe puerte bacna soye jtsemnana. ¿Ndáyeca ndoñe şmattsóboyaye ínÿenga bacá cmojtsaborlana ora? ¿Ndáyeca ndoñe cachcá şmatjonÿaye ínÿenga cmojtsabiatbëbana ora? ⁸Pero cach tşëngaftangaftacna inÿetşá copasana, ínÿengbioye bacá jtsaborlánana y jtsabiatbëbanana, y tşëngaftangcá Crístbeñe oşbuachiyëngbioynaca.

⁹¿Tşëngaftanga ndoñe şmondétatşëmbo, chë bacna soye amënga Bëngbe Bëtsabe amëndayoye ndoñe mochanjámashënguama? Ndoñe matenoíngñana. Ni chë boyabása o shembásaftaca bacna soye amënga, ni chë cachëngbe pormana soyënga diosënga yomna ca jtsejuabnayëse adórayënga, ni cachëngbe boyá o shema ínÿaftaca íngñayënga, ni chë boyabásenga mo shembasengcá jtsinÿnama boşënga, ni chë boyabásenga inÿe boyabásengaftaca bacna soye amënga, ¹⁰ni chë atbëbanënga, ni chë nÿe cachëngbiama bëtscá soyënga jtsebmna tşa boşënga, ni chë tşa tmoyënga, ni chë uayátseñayënga, ni chë ínÿengbiama bacna soye jtsamëse inmëtsatbëbanënga, chënga

nÿetscanga ndoñe quemochatobenaye Bëngbe Bëtsabe amëndayoye jamashjnama. ¹¹ Y tempo báseftanga tšëngaftanguentsënga chca šmojamna, pero Bëngbe Bëtsá tšëngaftangbe bacna soyëngama tcmojaperdoná, y chca entsemna mo bebénënga cuaftsemncá; cha tojama tšëngaftanga chabe entšanga chašmotsemnana, nÿe cha chašmotseservénana, y tojama tšëngaftanga mo tšabengcá chabe bominjÿiñe chašmotsemnana. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espiritu tojamama.

**Bëngbe cuerpo chaotsemna
Bëngbe Utabná jtseservénana**

¹² Mondbëtsichamo: “Atšbiana entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyënga jtsamana ndoñe atšbe tšabiana ntsemnana. “Atšbiana entselesenciana ndayánaca jamama ca”, pero ndoñe quichatsleséncia ndaye sóyecnana nÿets tempo mandaná jatsmëñana.

¹³ Mëntšánaca mondëtsichamo: “Saná uafsbiana y uafsbíá saná chaóyëngacñama ca.” Pero Bëngbe Bëtsá canÿe te echanjama chë uta soye chaotsopochocama. Bëngbe Bëtsá entšabiana cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiana tšabe bendicionënga chaotsamama.

¹⁴ Y Bëngbe Bëtsá, nda tojama Bëngbe Utabná cháuatayenama, bëngbiámnaca chabe obenánaca echanjama chámuatayenama.

¹⁵ ¿Tšëngaftanga ndoñe šmondétatšëmbo, Crístoftaca

cánÿiñe mo canÿacá šmomnana yomna mo tšëngaftangbe cuerpo chabe cuerpentša soye cuaftsemncá? Tšëngaftangbe cuerpo Crístbioye jaserviama endmëñayeca, tšëngaftangbe cuerpo jtsemnana mo Crístbe cuerpentša soycá. ¿Ntšamo atše chjátobena atšbe cuérpoca, chë ndayá yomna mo Crístbe cuerpentša soycá, canÿe bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe! ¹⁶ ¿O tšëngaftanga ndoñe šmondétatšëmbo, canÿe entšá canÿe bacna vida bomna shembásaftaca tbojéninÿena ora, chë útata jóbemana mo canÿacá? Er Bëngbe Bëtsabe uabemana palabrenguiñe boyabása y shembása tbojéninÿenama mëntšá endayana: “Chë útata mo canÿacá bochántsema ca.” ¹⁷ Pero canÿe entšá Bëngbe Utabnáftaca cánÿiñe mo canÿacá tojtsemna ora, jtsemnana mo chë útata cach canÿe espíritu tbojtsebomncá.

¹⁸ Nÿa ndocna te canÿe boyabása o shembásaftaca bacna soyënga šmattsama. Nderado ndaye inÿe bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamamna, lempe jamana nÿe cachabe cuérpoca, y chë causa, chca jamëse, cachabe cuerpama más bacna soyënga jtsamana. ¹⁹ ¿Tšëngaftanga ndoñe šmondétatšëmbo tšëngaftangbe cuerpo yomna mo canÿe yebncá Uámana Espiritbiana, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna,

sinó Bèngbe Bètsabe soye. ²⁰ Chca endmèna, er Cristo bènga játsebacama tojanóbana ora, yojamna mo cha bètscá cuafjopagacá tsèngaftanga Bèngbe Bètsábenga chašmotsemnana. Chíyeca, chë tsèngaftangbe cuerpéngaca chašmojtsama soyéngaca šmochtsinÿanÿnaye Bèngbe Bètsá puerte uamaná y bètscá bétsemnana.

Jobouamayama jábuayenama

7 ¹ Mora chanjóyebuambaye ndayá tsèngaftanga átšbioye šmojuábobemama. Ndegombre, canÿe šoyabásabiana más tsábá endmèna ndoñe chaondobouamá. ² Pero choca banga boyabása o shembásaftaca bacna soye amènga imojtsemna causa, tsábá entsemna cada boyabása chabe shema chabotsóbomñe, y cada shembása chabe boyá. ³ Boyábioye bontsemna jamana chabe shembiana lempe ntšamo jamama ibomncá, boyá bétsemnana; y chabe shémnaca cachcá chabe boyabiana chaoma. ⁴ Chë shembe cuerpo ndoñe ñye cha cánÿabiana ntsemnana, sinó chabe boyabiámnaca. Cachcá, chë boyabe cuerpo ndoñe ñye cha cánÿabiana ntsemnana, sinó chabe shembíámnaca. ⁵ Ni boyá, ni shema ndoñe chabondètsejuabná jtsenbiátšbuana. Añe chca copodena, pero ñye chë útata chca básefta tescama tbojenóyeunase, Bèngbe Bètsáftaca jencuéntama jtsentšénama. Pero chentšana chë útata entsamna cachíne cánÿíne jtètsmènanana, chca, Satanás ndoñe chaondobená jamama bacna soye chaócohènguama, cachènga jenomándama ndoñe tmontsobena causa.

⁶ Atše chca séntsichamo, tsèngaftanga jábuayenama, ndayá jamama šmojtselesenciana, y chca

ndoñe chašmondétsamama jaméndama. ⁷ Y atšbe barièna, atšbe juabna entsemna malaye ñyetscanga chë soyènguiñe mo atšcá šmattsemna. Pero Bèngbe Bètsá cada ona obenana tbojatsétá tsabe soyènga jamama, Crístbeñe ošbuáchiyènga jujabuáchama, ínÿenga canÿe soyama, ínÿengna ínÿe soyama.

⁸ Chë cabá ndbouamnènga y viudanga séntsétsétsná, chèngbiana tsábá yojtsemna ntjobouamaycá joquédana, atšcá. ⁹ Pero chca jtsemnana cachènga jenomándama ndoñe tmontsobenèse, chènga entsamna jtsóbouamayana, er más tsábá endmèna jtsóbouamayana, y ndoñe ñye boyabásabiana o shembásabiana tša ñyets tempo jésejuabnayana.

¹⁰ Pero chë bouamnènga séntsaménda shema chabe boyábioye ndoñe cachcá chabondetsonÿá. Chca ndoñe ñye atše quetsataménda, ndayá cach Bèngbe Utabná. ¹¹ Pero, shema cachcá chabe boyábioye tbojesonÿase, cha bontsemna ntjobouamaycá jtsomñana o chabe boyáftaca cachíne jtenútanana. Y cachcá, chë boyá ndoñe quebnátsmèna chabe shema cachcá jesonÿayana.

¹² Chë ínÿenga chjáuyana, atšbe juabncá y ndoñe Bèngbe Utabnabe soycá, nderado canÿe ošbuachiyá tbojtsebomna canÿe shema Crístbeñe ndošbuachiyá, pero chë shema tojtseboše cháftaca joquédana jtsiyenama, cha chë shémbioye ndoñe cachcá chabondetsonÿá. ¹³ Nderado canÿe ošbuachiyá tbojtsebomna canÿe boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondètsejuabná cha cachcá jesonÿayana. ¹⁴ Er Bèngbe Bètsá

tojama, canÿe shembása ošbuachiyá chabe entšá chaotsemnama, ñe chábioye chabotseservénama, y chca, chánaca jtsejuabnayana chë shembásabe boyá Crístbeñe ndošbuáchiyabiama mo chabiama oservena entšacá, cha chéngbeñe mo canÿe pamillécá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnayana chabe shema Crístbeñe ndošbuáchiyabiama mo chabiama oservena entšacá, cha chéngbeñe mo canÿe pamillécá jatrabájama tojtseboše ora. Er chca ndoñe tontsemñese, chë básenga muántsemna ndošbuachiyatbe básenga, Bëngbe Bëtsáftaca tondaye ndbomñenga. Ndoñe chca yondménayeca, canÿa o ñyets uta bëtsétsatbe ošbuáchiyama, Bëngbe Bëtsá jtsejuabnayana chë básengbiama mo chabe entšangcá.

¹⁵ Pero chë boyá o shema Crístbeñe ndošbuachiyá cachcá jtseónÿayama tša tojtsebošese, chca chaboma. Chora, chë ošbuachiyá ndoñe ntsotocánana chë ññaftaca cachiñe jtëtenútanama, er Bëngbe Bëtsá tcmojáchembo natjémbana chašmotsiyenama. ¹⁶ Chca šmochjama, er aca shema ñntšamo cattsetátšëmbo, tacuatjobenaye acbe boyá jayénjanana Crístbeñe chaotsošbuáchema, y chca, ats bocaná chaotsemnama? o aca boyá ñntšamo cattsetátšëmbo, tacuatjobenaye acbe shema jayénjanana Crístbeñe chaotsošbuáchema, y chca, ats bocaná chaotsemnama?

¹⁷ Masque ntšámñaca, cada ona chaotsiyena jtsamëse ntšamo chë Bëngbe Utabná tbojatšetá obenana yomncá, cada ona ndayá jamama Bëngbe Bëtsá tbojachembcá. Chca atše ñyets luare ošbuáchiyënga nefjuanenache sëndbëtsamëndaye.

¹⁸ Nderado Bëngbe Bëtsá cánÿabioye tbojachembo, y cha ñnyëngbeyeca chë más delicadentše base bobachtema tëtšená tojtsemna, ntšamo chë judiënga monduamancá, cha ndoñe chaondëtse nobiamná mo ndoñe judío cuafjatsmëncá; y nderado Bëngbe Bëtsá cánÿabioye tbojachembo, y cha ndoñe chca tëtšená tontsemñese, cha ndoñe chaondëtsejuabná tëtšená jatsmënana, ntšamo chë judiënga monduamancá.

¹⁹ Er ndayá iuámama, ndoñe quenátsmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtsamama. ²⁰ Cada ona bontsemna jtseyëñana, ntšamo vojoyencá, chabe entšá chaotsemnama Bëngbe Bëtsá tbojanchembo ora.

²¹ Bëngbe Bëtsá tcmojanchembo ora, ñyets tempo ñnyabiama oservená cojamñese, chama ndoñe cattsenócochinÿena. Pero nderado tojtsemna ntšámose jashjáchama ndoñe más chca ntsemnama, cach acbiama jatrabájama, as chca cochjama.

²² Er chë ñe ñnyabiama ñyets tempo oservená yojamná, Bëngbe Bëtsá chabe entšá chaotsemnama tbojanchembo ora, cha mora ošbuachiyacá, jtsemnana canÿa ya ndoñe más bacna soyënga jamama juabnéngaca mandaná, sinó Bëngbe Utabnabiama oservená. Cachcá, chë ñe cachabiama trabajayá yojamná, Bëngbe Bëtsá tbojanchembo ora, mora cha ñyets tempo Crístbe oservená jtsemnana. ²³ Cristo bëngbiama tojanóbana ora, yojamna mo cha bëtscá cuafjopagacá, bënga Bëngbe Bëtsabe entšanga chamotsemnama. Ndoñe šmatjaleséncia ñe entšangbe juabnéngaca ñyets tempo mandánënga chašmotsemnama, y Bëngbe Bëtsabiama chacmotsebnëtjomba.

²⁴ Chcasna, Jesucrístbeyeca atšbe catšátanga, cada ona bontsemna

Bëngbe Bëtsáftaca jtsiyenana, ntšamo vojoyencá Bëngbe Bëtsá tbojanchembo ora.

²⁵ Y chë ndébouamna shembásengbiama, chënga aíñe o ndoñe yontsamna jobouamayamna, atše chama ndoñe Bëngbe Utalnabe canye mando quetsátsbomna, pero chanjayana ntšamo atše tsjuabnacá. Bëngbe Bëtsá atšbe tsábiamana tojanjuabóyeca, entsanga montsobena jtsejuabnayana aíñe tsabe palabra bomná chíne atše tsmënana. ²⁶ Atše šontsinýana, entsá ibojtsemna jtsomñana nye ntšamo mora yotsomñácá, er bënga mora montsiyena puerte padecena soyënguiñe. ²⁷ Shema tcbomnëse, ndoñe cachcá catjëftsonýaye; y ndoñe tcondbomnësna, ndoñe catjásënguaye. ²⁸ Tcojobouamase, bacna soye ndoñe quecátama; y nderado canye tobiáse tojobouamase, cach bacna soye ndoñe quenátama. Pero chë tmojt sobouamangna padecena soyënguiñe mochanjoyena quem luarentše chamojéftsemnëntsucana, y atše séntseboše chënga jujabuáchama chca jatienana ndoñe chaondétsamnama.

²⁹ Jesucristbeyeca atšbe catšátanga, ntšamo séntseboše jayanamna mëntšá entsemna: Cristo quem luaroye yochjésabo orscama ya nye batšá entsájamna. Chíyeca, morskana y nyets tempo más chcoye, chë bouamnënga entsamna jtsiyenana mo ndoñe bouamnënga tmontsemncá, o mëntšá, entsamna jtsentsénana Bëngbe Bëtsabe soyënguiñe, y ndoñe nye chë bouamná bëtsemnama tbojtsemna soyënguiñe. ³⁰ Cachcá, chë puerte ngménaca tša ošachiyiñe imomnënga, entsamna jtsiyenana mo ndoñe chca tmontsemncá; y chë

puerte oyejuayënga, chamotsiyena mo ndoñe chca tmontsemncá; chë soyënga buamnayënga chamotsiyena mo tondaye chëngbe soye tontsemncá. ³¹ Chë quem luarentša soyëngaca jtsiyenama imojtsentsénënga entsamna jtsiyenana mo ndoñe chca tmontsamcá, er quem luare ntšamo bënga mora monduabuatomcá, pronto echanjochnëgo.

³² Atše séntseboše tsëngaftanga ndoñe chašmondétsenocochinýenama. Canye entsá ndoñe bouamná tontsemna ora, jtsobenana jtsentsénana Bëngbe Utalnabe soyëngama jtsejuabnayama, y ntšamo oyejuayá cha jabemama; ³³ pero chë bouamná nyets tempo jtsenócochinýenana quem luarentša soyëngama, jtsiyenama, y ntšamo chabe shema oyejuayá jtsebomnama; ³⁴ y chca, cha uta soyiñe canye ora jtsentsénana. Chë ndébouamna shembása y chë tobiáse bontsobena jtsentsénana Bëngbe Utalnabe soyënguiñe sempre jtsejuabnayama. Chënga mondobena jtsentsénana Bëngbe Bëtsá jaserviama, ndayá chëngbe cuérpoca y chëngbe espíritoca tmojamama. Pero inyetsá, chë bouamna shembásana, nyets tempo jesenócochinýenana quem luarentše vida jtsebomnama soyëngama, y ntšamo chabe boyá oyejuayá jtsebomnama.

³⁵ Atše chca cbontsëtsësná tsëngaftangbe tsábiamana, y ndoñe jamëndama ba soyënga jamama ndoñe chašmondétsobenama, ndayá ntšamo tsábá yomncá chašmotsiyenama, y nye Bëngbe Utalná jtseservénama chašmotsentsénana.

³⁶ Nderado nda tojtsejuabná chabe uatsësnaye tobiášeftaca jtsobouamayama ibojtsemna ca,

chca jamama chë tobiáše ya bëtšá tojtsemnayeca, y chca jamama tšá tšabá yojtsemna ca tojtsejuabnase, cha bontsemna jamana ntšamo tojtsebošcá. Chaotsobouamá. Chca tojama ora bacna soye ndoñe ntsamana. ³⁷Pero nderado inÿa, tondaye obligaciönaca tontsemna y lempe ntšamo tojtsebošcá cha tojtsobena jamama, cha tšabá tojajuabó y chabe ainaniñe corente tojtsetátšëmbo, ndoñe ntsobouamayana tšabá yomna ca, cha tšabá chca jtsamana. ³⁸Chcasna, chë tobiášeftaca tojtsobouamá chana, canÿe tšabe soye jamana; pero chë ndoñe cháftaca tonjobouamá chana, canÿe más tšabe soye jamana.

³⁹Chë shembása bouamná jtsotocánana chabe boyáftaca sempre jëftsiyenana, chë boyá vida tojtsebomñentscuana; pero chë boyá tojóbanese, cha jtsobenana cachiñe jtobouamayana, nda cha tojtsebošáftaca, pero chca chaoma mo canÿa Bëngbe Utabnáftaca cánÿiñe mo canÿacá quetsomñecá. ⁴⁰Pero atše jayanamna, cha más oyejuayá nántsemna ndoñe tontóbuomase; y séntsejuabná, átsnaca tsbomna chë Bëngbe Bëtsabe Espíritu chašotsebuayiynama.

Uátšëmbona saná entšangbe pormana soyëngama

8 ¹Mora chanjóyebuambaye ndayá tšëngaftanga atše šmojatjama, ndayá jtsesayama, chë tempo ínÿenga cachëngbe pormana soyënga, diosënga yomna ca jtsejuabnayëse jadórama tmojanátšëmbona soyëngama. Bënga mondétatšëmbo bënga nyëtscanga osertánënga imomnama. Canÿa tbojtsosertana ora, cha nderado nanjájuaboje, chca bëtsemnama puerteanamá cha yojtsemna ca, pero canÿa,

ínÿenga tojtsababuánÿeshana ora, cha jtsobenana chënga becá jujabuáchana.

²Nderado nda tojtsejuabná ndegombre canÿe soye yotátšëmbo ca, cabá ndoñe yontsetátšëmbo ndayá jtsetatšëmbuama ibojtsemncá. ³Pero nderado nda Bëngbe Bëtsábioye tbojtsebobonshana, Bëngbe Bëtsá chábioye jtsabuatmana mo chabe entšacá.

⁴Y chë tempo ínÿenga cachëngbe pormana soyënga, diosënga yomna ca jtsejuabnayëse jadórama uátšëmbona soyëngamna, atše šcuayana: bënga corente mondétatšëmbo chë chënga imnëtsadorana soyënga, diosënga yomna ca jtsejuabnayëse, ndegombre ndoñe dios quemátsmëna y nÿe canÿa Bëngbe Bëtsá endmëna. ⁵Pero masque celoca y quem luarentše chamomna entšangbiama “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondmëna, entšangbiama diosënga ca ubuátmënga, y banga bëtš mándoca entšangbiama “utabnënga ca” uabáinënga), ⁶bënga chë ošbuáchiyëngbiama nÿe canÿa Bëngbe Bëtsá endmëna, Bëngbe Taitá, ndábentšana nyëtsca soyënga yóbocana, y nÿe nda jtseservënama bënga imoyena. Y nÿe canÿe Utabnánaca endmëna, Jesucristo, ndábeyeca nyëtsca soyënga yomna, y cach bëngnaca imomna.

⁷Pero nyëtsca ošbuáchiyënga ndoñe chca quemátstatšëmbo. Básefta entšanga, Crístbeñe cabá ntsošbuáchiye ora, imoanamana ndaye sanánaca juatšëmbonana, chë chënga imojuabná diosënga yojamna ca soyënga jadórama; chënga, chca uatšëmbonana tmojtsesá ora, jtsejuabnayana chca uatšëmbonana bëtsemnama, y ainaniñe juabnënga

jtsebomnana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemátobena tšëngaftangcá jtsejuabnayana, chcana jasana bacna soye ndoñe yondmëna ca. ⁸ Ndegombre, ndayá bënga tmojtsesacá ndoñe ntjamana bënga Bëngbe Bëtsábioye más chamuatobéconama. Bënga Bëngbe Bëtsabe bominiñe ndoñe quemochátsmëna más tšábenga aíñe tmojtsesama; ni ndoñe chcanga, ndoñe tmontsesá causa.

⁹ Pero cuedado šmochtsebomna, ndayá jamana yolesenciánama tšëngaftanga corente tšabá šmotatšëmbuama, ndayánaca jatsmana, y chca causa ínÿenga, chë soyënguiñe más batsá ošbuáchiyënga y osertánënga, ntšamo tšëngaftanga šmojtsamcá chamuatasmama, y chentšana, chëngbe ainaniñe juabnënga chamotsebomna y chëngbioye chaotsëtsësná ndoñe tšabá tmonjama ca. ¹⁰ Er, aca chë soyëngama tatšëmbuá, nderado tcojót'bema jasama canÿe luarentše, canÿe soye ndayama entšanga dios yomna ca jtsejuabnayëse adórayentše, y canÿe Crístbeñe ošbuachiyá tojtsebomna ainaniñe juabnënga ndoñe tšabá tonjamama, chca tojáseyeca, aquëcá chë soyëngama ndoñe yondétatšëmbo causa, y cha nderado chentše cojtsesama tcmojinÿëse, chë soye nanjobenaye chábioynaca jañëmuana chë saná jasana, chë tempo chë soyëngama tmojanátšëmbona saná. ¹¹ Y chca aca, chë soyëngama ntšamo betatšëmbuama tcojamama, catjama chë Jesucristbeyeca acbe catsata, chë ndoñe corente ošbuachiyá, y ndoñe aquëcá chë soyëngama corente tatšëmbuá, cha pochocaná chaotsemnana, er chabe ainanentše

echántsemna juabnënga canÿe bacna soye tojamama, chë saná tojasama. Chca nderado cánÿabioye catjama, ndabiama Cristo tojanóbana, cha jatsbocama. ¹² Jesucristbeyeca acbe catsatbiama chca bacna soye tcojama ora, chca causa cha canÿe soye tojama, ndayama chabe juabnënga ainaniñe chabotsatsëtsná ndoñe chca chaondétsama ca; y chca, chentšana tša tojesejuabná cha canÿe bacna soye tojamama, acna canÿe bacna soye jamana, ndoñe nÿe chë catsatbiama, ndayá cach Crístbiámnaca. ¹³ Chíyeca, nderado ndayá atše stsesama, atše tsjama Jesucristbeyeca atšbe catsata chaoma canÿe soye y chca jamama chabiama canÿe bacna soye tojtsemnëse, más tšabá nántsemna ndocna te chë soye atše ntjasana, chca, atše ndoñe jatsmama cha canÿe bacna soyiñe chaótsatšama.

Jesucristbe ichmónëngbe derecho

9 ¹ Ndegombre endmëna, atše ndayánaca jamana stselesenciánama y Moisesbe leyëngaca ndoñe más mandaná sëntsemnana. Cach ndegombre endmëna, atše canÿe Jesucristbe ichmoná tsmënama y Jesús Bëngbe Utabná tijinÿama; y cach tšëngaftanga mora ošbuáchiyënga jtsemnëse, šmondmëna ndayá tojóbocna Bëngbe Utabnabiama atšbe trabajuentšana. ² Masque ínÿenga atšbiama ndoñe quematsjuabná atše canÿe Jesucristbe ichmoná tsmëna ca, tšëngaftangiamna aíñe chca endmëna; er tšëngaftanga Crístbeñe ošbuáchiyënga šmondmënama y Bëngbe Utabnáftaca cánÿiñe mo canÿacá šmondmënama, puerte tšabá šmontsinÿanÿná atše Jesucristbe canÿe ichmoná tsmënama. ³ Mëntšá chanjayana chë atše ndoñe tšabá tijama ca imojtsichámëngbiama:

⁴ Ndegombre bënga nyets derecho fsëndëtsóbmñe jtsobátmanama tsëngaftangbentšana, chë tbojujabuáchëngbentšana, bëngbe trabajuama saná o ndayá jofsiyama chašcuacaredadama. ⁵ Y bëngnaca derecho fsëndëtsóbmñe canye shema ošbuachiyá jtsebmnama y bëngaftaca cha jëftsbtšana inye luaroye fstsajna ora, ntšamo chë Jesucristbe inye ichmónënga, Bëngbe Utabnabe catsátanga y Pédrënaca mondbetsamcá. ⁶ ¿O nye Bernabé y atše šojtsëtocana cabëndatbe cucuátšëca jatrabájana vida jtsebmnama, y ndoñe derecho fsëntsebmna ošbuáchiyënga chašotsacuédanama, Bëngbe Bëtsabiana trabájayama? ⁷ ¿Ndëmua mo canye soldadca tojtsoservená, ndayá tbojtsájabotama cachá nantsatopagana, vida jtsebmnama? Ndocná canye jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanýenana, chë tojabuatëba létšiyentšana ndoñe ntjofsiyama. ⁸ Ntšamo atše muentše sentsichamcá ndoñe nye entsangbe juabna quenátsmëna; y Moisesbe leyínnaca cachcá endayana, ⁹ er chabe leyíñe mëntšá endayana: “Aca canye toróftaca shajuana tmojtsatbaná luariñe chacojsetrabája ora, ndoñe catjuanguëtšenaye ca.” Y chca ndoñe quenátayana Bëngbe Bëtsá nye toronga inétsanýena ca, ¹⁰ sinó inye más bëts soye; chca endayana ndayá ndegombre bënga, chë Bëngbe Bëtsabiana soyëngama abuayiynayiñe trabájayënga cha šnetsanýena ca. Chca tmojanábema bëngbiana, er chë fshantse arayá y chë meshënga atbanayá, entsamna chca jamana jtsobátmanëse, chë tmojátabe shajuantšana batsá

jóyëngacñama. ¹¹ Y chca, bënga chë tsabe noticiëngama tbojábuaenase, y chca, Bëngbe Bëtsábicocana tsabe bendicionënga chašmotsebmnama bënga tifjama, ndoñe yapa tanandátsmëna tsëngaftanga jótjañana, chë šmobomna soyënguentsana bënga jëftsiyënana chašcuatšatama. ¹² Inyënga derecho tmojtsebmna tsëngaftanga jótjañana chë šmobomntšana chašmuacaredadama, tsëngaftangbeñe chëngbe trabajuama, as bënga más derecho fstsebmna chca jamama.

Pero bënga tondaye checbatamëndá, bënga chë derecho bëtsebmnayeca. Chca játamamna, bënga lempe fsëntsoboyá, chca, bënga tondaye ntjátamama, y chë causa entsanga ndoñe chašondétsayaunana, bënga chë tsabe noticiënga fstsabuayiyná ora. ¹³ Tsëngaftanga šmondétatšëmbo, Bëngbe Bëtsabe bëts yebnoca trabájayënga Bëngbe Bëtsabiana oservéniñe, mondbóyëngacñe chënga jasama, ndayá entsanga Bëngbe Bëtsá jadórama chabe bëts yebnoye tmojiyëbo sananguentsana. Y chë Bëngbe Bëtsá jadórama soyënga amënga, altaroca, chë juatšëmbonama luarentše, chënga jasana ndayá chentše tmojuatšëmbona soyënguentsana. ¹⁴ Cachcá, Bëngbe Bëtsá tojamandá, chë tsabe noticiënga abuayiynayëngna, vida jtsebmnamna lempe ntšamo tojtsëjbotcá chamóyëngacñe ca, chë tsabe noticiënga abuayiynayama. ¹⁵ Pero atše ndocna te chiyaisemandá inyënga chca chašmotsecuedánama, atše chë tsabe noticiënga abuayiynayá bëtsemnama chca derecho tsbómnyeyca, y cach ndoñe mora quem soye quecbatëbuabiamná, tsëngaftanga ndayánaca atše chašmuatšetama. Atšbiana más tsabá nántsemna

jóbanana, y ndoñe ntjalesénciana inya chaoma atše cach atšbiama oyejuayá ndoñe ntjátsmënama, ínÿengbentsana soyënga stjýëngacñe causa.

¹⁶ Atše ndoñe quetsatsjuabná atše canÿe bëts soye stsama ca, chë tšabe noticiënga stsabuayinama, er atše obligacónaca séntsemna chca jtsamama, Bëngbe Bëtsá chama šojanchémboyeca. iTša lastemcá atšbiama nántsemna, chë tšabe noticiënga ndoñe séntsabuayinase!
¹⁷ Chíyeca, atše chë tšabe noticiënga stsabuayiná nÿe atše chca jamama stsebóšeyeca, atšbe uacanana soye ya stsebmoma; pero atše chca stjama, y ndoñe tontsemna nÿe atše chca jamama stsebóšeyeca, masque chca, atše stsama, ndayá jtsamama Bëngbe Bëtsá šojanbonÿecá. ¹⁸ Y chca, atšbe uacanana soye endmëna atše oyejuayá jtsemnana chë tšabe noticiënga abuayinayama, ošbuachiyéngbentsana atše vida jtsebmomnama tondaye ntjatoyëngacñécá; chca, atše tondaye quetsátama chë tšabe noticiënga abuayinayama tsbmoma deréchoca, chë atšbe trabajuentšana vida jtsebmomnama.

¹⁹ Atše, masque ndocna entšábeyeca nÿets tempo mandaná quetsátsmëna, puerte nduamaná sënjobema, mo canÿa nÿets tempo ínÿabeyeca mandanacá, nÿetscanga jasérviama, chca, atše chca jtsamëse, jobenayama becá entšanga, ntšamo tojopodecá, jayénjanama Crístbeñe chamotsošbuáchema.
²⁰ Chë judiëngbiamna atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyëñjanama Crístbeñe chamotsošbuáchema. Y chë Moisesbe léyeca mandánënga imoyenëngbiamna, atše chëngcá sënjobema, masque

ndegombre chë Moisesbe léyeca mandaná ndoñe quetsátiyena; chca sëndbama chënga jáyëñjanama Crístbeñe chamotsošbuáchema. ²¹ Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyëñjanama Crístbeñe chamotsošbuáchema, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá. ²² Chë nÿe batsatema ošbuáchiyëngbiamna y Bëngbe Bëtsabe soyëngama nÿe batsatema osertánëngbiamna, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Crístbeñe chamotsošbuáchema. Y lempe chca, chë atše jamana ntšamo nÿetscanga imomncá atše chaitsemnana, endmëna atše jobenayama báseftanga jáyëñjanama Crístbeñe chamotsošbuáchema.

²³ Atše lempe chca sëndama, bëtscá entšanga chë tšabe noticiënguñe chamotsošbuáchema, y chca, atše atsbocaná chaitsemnana y chëngcá atše chayóyëngacñama, chë atsebácanënga Bëngbe Bëtsá yochjatsataye tšabe soyënga.

²⁴ Tšëngaftanga šmondétatšëmbo, canÿe luaroye jashjanguama entšanga tmojótjajo orna, banga jotjajuana, pero nÿe canÿa chë uacanana soye jýëngacñana. Chcasna, mo chë uacanana soye jýëngacñama tmojótjajëngcá, tšëngaftanga cmontsamna jtsiyenana, chë Bëngbe Bëtsábíocana uacanana soye josháchiñama. ²⁵ Nÿetscanga chë tmojótjajënga ínÿenga jáyëñjanama, chënga jopróntana nÿetsca soyënguñe jtse nomándayëse, chca, canÿe uacanana soye, tsuanachéngaca

uapormana coronésha juayéngacñama; y chésha betesco jtsanctana. Pero bēnga ndoñe; bēnga mondoyena Cristbiana soyēnga jtsamēse, Bēngbe Bētsábicocana ba tšabe soyēnga mo uacanancá jóyēngacñama, y chē soyēnga nyetsca tescama bēnga mochanjéftse bomna. ²⁶Y atšna, atšbe bariēna sēndētšena Bēngbe Bētsá jtseservénama, ndoñe mo canya ínnyēngbioye jáyēnjanama tojtjajuacá, chē ndémoye jashjanguama yomnama ntsetatšēmbcá; y cach ndoñe mo nda tojtse peliá orcá, chora, cha nye ínnyoye chabe buacuatšēnga tojtsētšana y chē ínnyabe cuerpo ye ndoñe. ²⁷Mo canye tšabe peliayacá, chabe cuerpo játsēsēnana y chca chē cuerpo corente jtsemándayana, atše ndoñe quetsatsleséncia chē atše tšabá jtsomñama atšbe ainanentša juabnēnga chašotsemándama; y chca, Crístbioye jtseservénēse chamotsiyenama ínnyēngbioye stjabuayená chentšana, Bēngbe Bētsá chašotsaboté chabe uacanana soye josháchiñama, cha ndoñe tšabá tijaservé causa.

**Cach entšangbe pormana soyēnga
ndoñe chamondētsadoránama
jábuayenama**

10 ¹Jesucristbeyeca atšbe catsátanga, atše séntseboše tšēngaftanga chašmotsetátšēmo bēngbe tempsca bēts taitanga judiēnga, chēnga nyetscanga Bēngbe Bētsá canye jantšētēsheca benache yojaninñanñá, y chēnga nyetscanga, chē Buángana ca uabaina mar bejayējana tmojanachnējna, chiñe mo bojojuiñe cuafsomñcá. ²Chē jantšētēsheca Moisés imojanéstonama, y chē mar bejayējana tmojánama, chēnga tmojanóbema Moisesbe ústonēnga. ³Chēnga nyetscanga

tmojanse cachca saná, chē Bēngbe Bētsá celocana tojanichmó saná; ⁴y nyetscanga tmojanofšé chē Bēngbe Bētsá tojanma chē peñēsētšana chaóbozna bējaye. Cristo chēngaftaca yojtsemna jtsanñenama chēnga imojtsajnēntscuana, y ntšamo chē peñēsētšē chēngaftaca tojanopasacá, yojaninñanñá Cristo chēnga yojtsanñenama. ⁵Masque chca, banga chēnguentšēnga ntšamo tmojanmama Bēngbe Bētsá ndoñe yontsoyejuaye; y chē causa, Bēngbe Bētsá tojanma chēnga chamóbanama chē entšanga ndoyentšē.

⁶Lempe chca tojanopasá bēnga jinñanñiyama y jábuayenama ntšamo inopása entšanga bacna soyēnga jamama tmojtseboše ora, bēnga chca jamama ndoñe chamondētsebošama. ⁷Chíyeca, tšēngaftanga ndoñe šmattsadorana entšangbe pormana soyēnga, ndayama ínnyēnga jtsejuabnayana diosēnga yomna ca, ntšamo báseftanga israeloquēnga tmojanmcá. Ntšamo Bēngbe Bētsabe uabemana palabrenguñe chēngbiana endayancá, chēnga canye tenerá castellánoca tmojanpormá ora, mo dios cuafsemncá jadórana: “Entšanga tmojanotbiana jasama y jatmuama, y chentšana tmojantsbaná joboyeuama ca”. ⁸Boyabása o shembásaftaca bacna soyēnga ndoñe šmattsama, ntšamo báseftanga chēnguentšēnga tmojanmcá, y chē causa, nye canye te, uta bnētsana y unga uaranga entšanga tmojanóbana ⁹Bacna soyēnga ndoñe šmattsama, jinñyama buetatescama Bēngbe Utabná uantado yochjéftsemnana y ndoñe šochanjacastígayama. Báseftanga chēnguentšēnga chca tmojanma, y chē causa tmojanóbana mētšcuayéngaca ftētšēnēnga. ¹⁰Bēngbe Bētsabe contra ndoñe šmattsóye buambnaye, ntšamo

báseftanga chënguentsënga tmojanmcá, y chë causa, chë ángel obanayá tojanma chënga chamóbanama.

¹¹ Lempe chca bëngbe tempsca bëts taitángaftaca tojanopasá, bënga jinýanýiyama ntšamo jtsiyenana šojtsamnama, y Moisés, Bëngbe Bëtsabe uabemana palabrënguiñe chca tojéftsanboshjona bënga jabuátambama, bënga, chë Jesucristo yochjésabo orscama ya batšatema yojtsájamna ora oyenëngbiama. ¹² Chcasna, nda tojtsejuabná Bëngbe Utabnabiama tšabá yojtsama ca y bacna soyënga ndocna te yochanjama ca, cuedado chaotsebmna, bacna soyënga amiñe ndoñe chaondótsatsama. ¹³ Ndocna entšá jatócochënguana bacna soyënga jamama, ntšamo tempo ínýenga ndoñe tonjanocohëngcá cachca bacna soyëngama, pero tšëngaftanga corente šmondétatsëmbo Bëngbe Bëtsá sempre cmochtséjabuachanama chë padecena soyënguiñe, y cha ndoñe yochanjalesénciama bacna soyënga jamama chacmócochënguama, tšëngaftanga chca soyënga jamama jtsóboyayama obenana ntsebmncá; pero chë padecena soyënguiñe chašmojtsemna ora, cha cmochanjínýanyiye ntšamo chë bacna soyënga ora tšabá jabocanama, y chca, jtsóboyayama chašmotsobenama.

¹⁴ Chíyeca, atšbe bonshánënga, ndocna te šmattsadorana cach entšangbe pormana soyënga, ndayama ínýenga jtsejuabnayana diosënga yomna ca. ¹⁵ Atše sëntsoyebuambná mo tšëngaftanga corente osertánënga cuaftsemncá. Cach tšëngaftanga šmochjenójuaboye y šmochjayana, ntšamo chojtsëtsëtsnacá aíñe o ndoñe tšabá bëtsemnana. ¹⁶ Ntšamo Jesús chë coptema vinoyama

Bëngbe Bëtsábioye tbojtanchuacá, bëngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinýanýayana bënga Crístoftaca cánýiñe mo canýacá imomnama, chabe buiñe juabuáshanëse bëngbiama tojanóbanayeca. Y chë mondbajataye tandëše tmojase ora, jtsinýanýayana bënga Crístoftaca cánýiñe mo canýacá imomnama, cha bëngbiama tojanóbanayeca. ¹⁷ Bënga ošbuáchiyënga masque banga mondmëna, chca orna nýetscanga cach tandëšëntšana bënga jasaná, y chíyeca bënga jtsemnana mo canýacá, mo Cristbe cuerpcá.

¹⁸ Tšëngaftanga šmochtsejuabnaye ndayá chë Israeloca bachnanga monduamanama: chënga chë altaroca tmojóba y tmojuátšëmbona bayënguentshana jasaná, y chca chënga chora jtsinýanýayana chënga cánýiñe mo canýacá imojtsemnama Bëngbe Bëtsáftaca, chë chca tmojtsadoranáftaca. ¹⁹ Y chca, atše ndoñe quetsátsboše jayanama chë entšangbe pormana soyënga mo diosënga cuaftsemncá, uamana soyënga yomna ca. Ni chë cach entšangbe pormana soyënga diosënga yomna ca jtsejuabnayëse jadórama uátšëmbona saná ínýe sanama más iuámana ca. ²⁰ Pero aíñe, entšanga cach entšangbe pormana soyëngama mo diosënga cuaftsemncá, chca tmojuátšëmbona ora, ndegombre chënga Satanás y chabe uajabuachanëngbiolye jtsadoránana, y ndoñe Bëngbe Bëtsábioye. Y atše ndoñe quetsátsboše, tšëngaftanga chca uatšëmbonana šmojasama, cánýiñe mo canýacá chë bayejëngaftaca chašmotsemnama. ²¹ Tšëngaftanga ndoñe quešmátobena chë vínoye

coptémentšana jofšiyana, ntšamo chë ošbuáchiyënga bétsemnana mondbetsamcá, y chentšana chë cach entsangbe pormana soyënga, mo diosënga cuaftsemncá jadórama vínoye coptementésánëna. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmátobena vínoye jofšiyana y tandëše jasana, ntšamo ošbuáchiyënga bétsemnana mondbetsamcá, y chentšana cach entsangbe pormana soyënga mo diosënga cuaftsemncá jadórama fiestentša sanánaca jasana, y chca chë bayëjëngbioye jtsadoránana.

²² Bënga chca tmojtsamama, bënga mochanjama Bëngbe Utabná puerte etonaná béngaftaca chaotsemnana, er chë bayëjëngaftaca bënga chca jtsamana. ¿O imojtsejuabná bënga chabiama más obenana bomnënga imomna ca?

**Lempe šmochjama Bëngbe
Bëtsá puerte bëtsá y uamaná
yomnana jinÿanÿiyama**

²³ Mondbétsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atše stjama ora ndoñe nyetscangbe tšabiama ntsemnana. “Entselesenciana ndayánaca jamama ca”, pero nyetsca soyënga ntšamo bënga tmojamcá, ošbuachiyëngbioye ndoñe ntjujabuáchana Jesucristbeñe más chamotsošbuáchema, y ainaniñe más añemo chamotsebomnana.

²⁴ Ndocná chaondétsama lempe ntšamo tojobenacá nÿe cachabe tšabiama, ndayá más chaotsama chë ínÿengbe tšabiama.

²⁵ Lempe mercadoca tmojtsena soyënguentšana šmochjase, ntjatstjanaycá chë mëntšena aínë o ndoñe tmonjuátšëmbona chë cach

entsangbe pormana soyënga, mo diosënga cuaftsemncá jadórama ca. Ndoñe chca šmattsetjanaye, ntšamo tšëngaftangbe ainaniñe juabnënga šmojtsebomnana; ²⁶ er ntšamo Bëngbe Bëtsabe uabemana palabrënguiñe endayancá: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

²⁷ Nderado canÿe ndošbuachiyá tcmojúbuaja chábioca jasama, y tšëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayëtšana chë saná tojóboचना ndocá ntjatstjanaycá, ntšamo tšëngaftangbe ainaniñe juabnënga šmojtsebomnana. ²⁸ Pero nderado nda tcmojáuyana: “Quem mëntšena cach entsangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canÿa chca tcmojáuyana, y ainanentše šmojtsebomna juabnënga, chë chca jamama ndoñe tšabá bétsemnana. ²⁹ Atše sëntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tšabá yondmënama, ndoñe chë tšëngaftangbe ainanentša juabnëngama.

Pero tšëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bétsemnana, ntšamo chë ínÿabe ainaniñe juabna yobomnana ca? ³⁰ Y atše chë ndayá stsesama Bëngbe Bëtsá tijëtschuase, ¿ndáyeca ínÿa šochjayana atše ndoñe tšabá tijama ca, chë soye tijasama, chë ndayama Bëngbe Bëtsá tijëtschuá ca?” ³¹ Masque ntšámnaca, cachcá, chašmojtsesá, o chašmojtsofšëšná, o ndaye inÿe soye chašmojtsama, ndayama Bëngbe Bëtsá ndocá

tonjayana, lempe šmochtsama Bëngbe Bëtsá puerte bëtsá y uamaná yomnama jtsinÿanÿayama. ³² Tondaye šmatjama ndayá chaobená jamana, ínÿenga Cristo chamotsábotema. Ndoñe chca šmatjama, ni judiëngbiama, ni ndoñe judiëngbiama, ni chë Bëngbe Bëtsábeñe ošbuachiyëngcá enefjuanëngbiama. ³³ Šmochtsama ntšamo atše sëndëntšencá, nÿetscanga nÿetsca soyënguñe oyejuayënga jtsabamnama, lempe ntšamo stjobenacá jtsamëse, ndoñe nÿe atšbe tšabiama, ndayá masna chë ínÿengbe tšabiama, chënga chamotsobenama chëngbe bacna soyënguentšana atsebácanënga jtsemnama.

11 ¹ Tšëngaftanga šmochtsiyena ntšamo atše sëndamcá jtsamëse, cach ntšamo atše sëndoyencá, ntšamo Cristo inetsamcá jtsamëse.

Ntšamo yomna shembásenga tšabá jtsemnama, ošbuachiyëngcá tmojënefjna ora

² Atše sëntseboše tšëngaftanga jáuyanana tšabá šmojana ca, tšëngaftanga nÿetsca soyënguñe atšbiama šmnétsenojuabnama, y tšëngaftanga šmojtsabuátambama y šmojtsamama ntšamo tcbonjanabuatambacá, cachcá ntšamo atše sënjëfisanboshjoncá.

³ Pero atše sëntseboše tšëngaftanga chacmësertá: nda nÿetsca entšanga iuaménda cha, Cristo endmëna; y nda shëmbioye ibománda cha, boyá endmëna; y nda Crístbioye ibománda chana, Bëngbe Bëtsá endmëna. ⁴ Nderado canÿe boyabása chabe bestšaše tojtsenátshotse, inÿe ošbuachiyëngaftaca cánÿiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana cachá chaotséuatjama,

chabe bestšásëca chca tojama causa. ⁵ Pero nderado canÿe shembása chabe bestšaše ndoñe tontsenátshotse, inÿe ošbuachiyëngaftaca cánÿiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana chama cachá chaotséuatjama; jtséuatjana mo cha lempe jshetëtšená cuaftsemncá.

⁶ Er, nderado canÿe shembása ndocna te tontseboše chabe bestšaše jtsenátshotsana, chabiama más tšabá nántsemna lempe chaotsenójshetëtše. Pero tojtsejuabná utsbotjená o chca lempe jshetëtšená jtsemnama cha yochtséuatja ca, as chabe bestšaše chaotsenátshotse. ⁷ Boyabása ndoñe quebnátsmëna chabe bestšaše jtsenátshotsana, er Bëngbe Bëtsá tojanma ntšamo cachá yomncá cha chaotsemnama, y chë boyabása chca jtsemnëse, jtsinÿanÿayana Bëngbe Bëtsá chabe mandayá yomnama. Pero ntšamo chë shembása yomncá, jtsinÿanÿayana chë boyabása chabe mandayá yomnama; ⁸ er Bëngbe Bëtsá, boyabása ndoñe tbonjanma shembásabentšana, ndayá shembása boyabásabentšana. ⁹ Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca. ¹⁰ Chíyeca, y chca jamama angelënga tšabá jtsinÿanáneyeca, shembása jtsemnana chabe bestšaše chaotsenátshotsama, chca, chaotsinÿayana inÿa chábeñe yomándama. ¹¹ Pero, Bëngbe Utabnábeñe ošbuachiyëngcá jtsiyenamna, boyabásenga y shembásenga cachcá jtseytëtanana. ¹² Er masque Bëngbe Bëtsá, shembása boyabásabentšana tojanma, mora, shembásabentšana boyabása jóbocnana; y lempe Bëngbe Bëtsábiocana endóbocana.

¹³ Cach tsëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canye shembásabiama Bëngbe Bëtsáftaca jencuéntana, bestšaše ntsenatsbotsá. ¹⁴ Ntsámo entsanga sempre mondbetsejuabnaya, ndayá tšabá bétsemnama, bëngbioye jtsabuátambayana, boyabása bën stjënéshta chabuájua tojalesenciase, cha jamana cachá chama chaotséuatjama. ¹⁵ Pero shembásabiamna, chë bën stjënéshta jtsinýanýnayana chabe botamanana y uámanana, er Bëngbe Bëtsá tojanma shembása bën stjënéshta chaotsábomnama, chca, cha chaotsebomna ndáyeca chabe bestšaše jtsenátsbotsama. ¹⁶ Masque ntšámnaca, ndánaca tojtseboše quem soyama más jatóyebuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatsleséncia chca ndoñe chaondétsemnama.

**Bëngbe Utabnabiama
jtenójuaboyama jasama ora,
chënga ndoñe tšabá imonjánama**

¹⁷ Mora cbochanjaménda soyënguñe atše ndoñe quetsátobena tsëngaftanga jáuyanana tšabá šmojama ca, er tsëngaftanga Crístbeñe ošbuachiyëngcá šmojénefjna ora, Bëngbe Bëtsá jadórama, atše šontsinýana chë soye yojtsoservena tsëngaftanga más bacá chašmotsemnama, y ndoñe tsëngaftangbe tšabiama. ¹⁸ Natsana cbochjáuyana, atše sënjouena tsëngaftanga ošbuachiyëngcá šmojénefjna ora, báseftanga canye soye innétsëjuabnaye y inýengna inýetsá ca, y atše sëntsejuabná batšana ndegombre chca yojtsemna ca. ¹⁹ Ndegombre jtseytana tsëngaftangbeñe

chamotsemna báseftanga canye soye juabnayënga y inýengna inýetsá, chca, nýetscanga chamotsetatšëmbuama ndëmuanyënga imojtsemna chë Bëngbe Bëtsá tojayana chënga tšabá tmojama ca. ²⁰ Tsëngaftanga tandëse jasama y vínoye jofšiyama šmojénefjna ora, ntšamo bënga fsënduamancá, Bëngbe Utabná bëngbiam tojanóbanama jtenójuaboyama, ndayá chora tsëngaftanga šmnetsamcá, ndoñe quenátsmëna ntšamo ndegombre cmojtsamncá, chë Bëngbe Utabnabiama jtenójuaboyama jasama ora; ²¹ er chë jasama tojobuache ora, cada ona inóntša jasama ndayá tojiyëbcá, y ndoñe ntjatobátmanana nýetscanga ndayánaca jasama chamotsebomnëntscuana; báseftanga shéntseca joquédana, y inýengna tša jëftsésana y jofšiyana jëftsótmenantscuana. ²² ¿Tsëngaftanga ndoñe yebna šmondobomna ndayentšë jasama y jofšiyama? ¿Ndáyeca tsëngaftanga šmojtsejuabná chë innénefjna ošbuachiyënga nduámanënga imomna ca, y šmojama chë chentšë tmojtsemnënga, tondaye ndobomnënga, chamotséuatjama? ¿Tsëngaftanga šmojtsejuabná atše cbochjáuyana tšabá šmojama ca, chë Bëngbe Utabnabiama jasama ora chca šmojamama? ¡Ndegombre ndoñe!

**Bëngbe Utabnabiama
jtenójuaboyama saná
(Mt 26.26-29; Mc 14.22-
25; Lc 22.14-20)**

²³ Er atše cach Bëngbe Utabnábentsana ntšamo cbontsabuatëmbacá sënjanóyëngacñe: Bëngbe Utabná cach uayayëngbe cucuatšinë tmojánboshjona ibeta, tandëse tojanca, ²⁴ Bëngbe Bëtsábioye tbojtanchuá chentšana, tojanjatá y

tojánayana: “Quem tandëse atšbe cuerpo entsemna; tšëngaftangbe tšabiama chanjóbana. Ntšamo mora montsamcá šmochtsama, atšbiama jtenójuaboyama ca.”²⁵ Cachcá, chë saná tmojansentšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tšëngaftanga chašmotsetatšëmbuama, ntšamo Bëngbe Bëtsá entšanga tojanašebuachenacá pronto yochtsemnama. Cada vínoye chašmojtsofšëšná ora, chca šmochjama atšbiama jtenójuaboyama ca.”²⁶ Er tšëngaftanga cada quemëntša tandëse chašmojttesá ora y quem coptementšaycá chašmojtsofšëšná ora, Bëngbe Utabná chaojésabëntscuana tšëngaftanga šmochántsinýanýnaye cha entšangbiama tojanóbanama.

**Ntšamo yomna jamana,
Bëngbe Utabnabiama
jtenójuaboyama jasama ora**

²⁷ Chcasna, Bëngbe Utabnabiama jtenójuaboyama jasama ora, ndánaca tandëšentsšana tojase y coptémentšana tojofšë, ndoñe chë ntšamo chaotsemnama Bëngbe Utabná yojanjuabnacá, chabiama Bëngbe Bëtsá jayanana cha puerte bacna soye tojama ca. Chë entšá chca tojama ora, cha jtsinýanýnayana, Bëngbe Utabnabe cuerpo y buiñe chabiama tondaye yonduámanama.²⁸ Chíyeca, entsemna cada ona corente chauenojuabó jtsetatšëmbuama aíñe o ndoñe yontseprontana chca jasama y jofšiyama, cabá ndëse y ndofšë ora.²⁹ Er nderado nda tojase y tojofšë, chë Bëngbe Utabnabiama jtenójuaboyama jasama ora, cach Bëngbe Utabnabe cuerpo yomnama ntjajuaboycá, cha chë sóyeca jamana Bëngbe Bëtsá

chabotsecastigama.³⁰ Chíyeca, banga tšëngaftanguentsënga šoquënga šmojtsemna, ínýenga añemo ndbomnënga, y ínýengna ndoñe nýe báseftanga tmojóbana.³¹ Pero bënga corente tmojajuabó jtsetatšëmbuama aíñe o ndoñe montseprontana ntšamo šuamncá jasama y jofšiyama, cabá ndëse y ndofšë ora; chca, Bëngbe Bëtsá ndoñe buántsemna bënga játacastigana, ntšamo tšabá yomncá ndoñe tmonjase causa.³² Pero, Bëngbe Utabná castígoca chca šojabuayená ora, jtsemnana bënga más tšabá jtsamama chamuatsjínýama, y chca, bayté chentsšana, Bëngbe Bëtsá ndoñe chabondétsemna játanayana bënga šojtsamna nýetsca tescama castigánënga jtsemnana ca, cánýiñe chë nýe quem luarama enójuabnaye entšangaftaca.

³³ Chca, Jesucrístbeyeca atšbe catsátanga, tšëngaftanga chë Bëngbe Utabnabiama saná jasama chašmojénefjna ora, cánýiñe nýetscanga šmochjabojátša.³⁴ Y nderado nda tbojtseshentsana, cachabe yebnoca chauétsese, chca, Bëngbe Bëtsá ndoñe chabondétsemna tšëngaftanga jácastigana chora ndoñe tšabá šmonjama causa. Chë inýe soyëngama ndayama tšëngaftanga šmonjatjá, chamna chanjamánda tšëngaftanga jányama chajjá ora.

**Bëngbe Bëtsabe tšetana obenana,
tšabe soyënga jamama**

12¹ Jesucrístbeyeca atšbe catsátanga, atše séntseboše tšëngaftanga chašmotsetatšëmbo Bëngbe Bëtsabe tšetana obenanama tšabe soyënga jamama, Crístbeñe ošbuáchiyënga jujabuáchama.² Tšëngaftanga šmondétatšëmbo, tšëngaftanga Crístbeñe

ndošbuáchiyënga šmonjamna ora, ínÿenga cmonjanabuatambá soyënga, y chora tšëngaftanga šmonjamna ínÿabeyeca uasjanëngcá, cach entšangbe pormana soyënga mo diosënga cuaftsemncá jadórama; y chë soyëngna ni mo jóyebuambayama ntsoberenana. ³ Chíyeca, atšë mora séntsebošë tšëngaftanga chašmotsetátšëmbo, ndocná ntsoberenana jayanana: “Jesús ndoñë chë Cristo quenátsmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntsoberenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñë tontsóyebuambnase.

⁴ Espiritu jamana bënga ndoñë chamondëtsebomnana cachca tšëtana obenana tšabe soyënga jamama, pero lempe jobayana cach canÿe Espiritbeyeca. ⁵ Bënga, Bëngbe Bëtsá mondëserveda, nÿetsca soyënguñë jtsetrabájayëse, pero cach Utabná nÿets chë trabajënga šojabanÿé.

⁶ Nÿetsca soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotsebomnana. ⁷ Bëngbe Bëtsá inétsama cada ošbuachiyá chaotsebomnana canÿe tšëtana obenana tšabe soyënga jamama, y chë soye jtsinÿanÿnayana Bëngbe Bëtsabe Espiritu chabe ainaniñë yomnana; y chë tšëtana obenana jtsemnana nÿetscangbe tšabiama.

⁸ Bëngbe Bëtsá, Espiritbeyeca, canÿa obenana jatštayana puerte osertanánaca chaóyebuambama, y ínÿana obenana cach Espiritbeyeca ndayámna corente jtsetatšëmbëse chaóyebuambama; ⁹ ínÿana cach Espiritbeyeca, obenana Crístbeñë

puerte chaotsošbuáchemá, y ínÿabiamna, cach nÿe canÿe Espiritbeyeca, obenana jatštayana šoquënga jáshnama; ¹⁰ ínÿana, obenana tšabe soyënga Bëngbe Bëtsabe obenánaca jamama, y ínÿana, obenana Bëngbe Bëtsabe juabna jóyebuambayama. Inÿana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espiritbeyeca o bacna espiritëngbeyeca tojtsemnana, y ínÿana, obenana chë tempo ndmabiyáñnaca chaóyebuambama, y ínÿana, obenana josértama ntšamo chë ndaye biyáñnaca jóyebuambayama obenana bomná tojtsichamcá, y ínÿengna chama jábuayenama. ¹¹ Pero cach Espiritu, chë nÿe canÿe Espiritu lempe chca jamana, ntšamo tšabá bëtsemnana cha tojtsejuabnacá cada entšábioye jatštayëse.

**Nÿetsca ošbuáchiyënga cánÿiñë,
mo Crístbe cuerpcá jtsemnana**

¹² Cuerpo nÿe canÿe soye endmëna y chë cuerpna ba soyënga jtsebomnana; masque chë cuerpo ba soyënga jtsebomnana, nÿe canÿe cuerpo jtsemnana. Bëngaftácnaca cachcá. Bënga banga mondmëna nÿetscanga Crístbeñë ošbuáchiyënga, pero Crístbeyeca, bënga cánÿiñë mo canÿacá jtsemnana. ¹³ Er bënga nÿetscanga, judiënga o ndoñë judiënga, nÿe ínÿabiamá nÿets tempo oservénënga o cachëngbiamá trabájayënga šojanëbaye, Crístoftaca cánÿiñë mo canÿacá, jtsemnana mo chabe cuerpcá, y chca yomna cach Espiritbeyeca; y Bëngbe Bëtsá tojama cach Espiritu nÿetscangbe ainanoye cháuamashënguama, bënga jtsamëndayama.

¹⁴ Cachcá, canÿe cuerpo ndoñë nÿe canÿe soye ntsebomnana,

ndayá ba soyënga. ¹⁵Nderado shecuatše tojayana: “Cucuatše ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmënana. ¹⁶Nderado matscuaše tojayana: “Bominÿe ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmënana. ¹⁷Nÿets cuerpo bominÿe tojtsemnëse, bënga ndoñe muantsobena jouenama. Y nÿets cuerpo matscuaše tojtsemnëse, bënga ndoñe muanjobenaye jونغuëtsetsiyana. ¹⁸Pero ndegombre endmëna, Bëngbe Bëtsá nÿetsca soye cuerpentše tojancjá ndayentše cha tojánbošenentše. ¹⁹Nÿetsca cuerpentša soyënga nÿe canÿe soye tojtsemnëse, ndoñe canÿe cuerpo nántsemna. ²⁰Pero ndegombre endmëna, masque ba soyënga cuerpentše yomna, nÿe canÿe cuerpo jtsemnana.

²¹Bominÿe quenátobena cucuatše jauyanana: “Ndoñe quecátsiyta ca”; y cachcá, bestšaše quenátobena shecuatše jáuyanana: “Ndoñe quecátsiyta ca”. ²²Inÿetšá, chë cuerpentša soyënga, chë tojtsinÿana mo obenana ndbomna y nduámama soyëngcá, jtsemnana chë cuerpama más iyta soyënga. ²³Chë cuerpentša soyëngama, ndayama bënga tmojtsejuabná más nduámama soyënga yomna ca, bënga jamana más chaotsámanama, chiñe entsáyaca jtichëtjëse. Y chë cuerpentša soyënga, ndayama bënga jtsëuatjana ínÿenga chamotsonÿama, bënga jamana ínÿenga ndoñe chamondëtsonÿama, chiñe entsáyaca jtichëtjëse. ²⁴Pero chë cuerpentša soyëngaca, chë

nÿetscanga jtsonÿayana y botamana jinÿama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámama soyënga, más chaotsámanama, ntšamo chë soyënga bënga tmojtsinÿenama. ²⁵Cha chca tojanma, cuerpentša nÿetsca soyënga chë cuerpama trabajo cánÿiñe chamotsamama, y chca, cada soye chaotsama trabajo chë cuerpentša nÿetsca soyëngbe tsabiama. ²⁶Nderado canÿe cuerpentša soyama bacna soye tojopasá, chora nÿetsca chë cuerpentša soyëngámna chca ndoñe tsabe soye jtsebínÿnana; pero canÿe cuerpentša soyama tcojama más uámama soye chaotsemnana o ndaye tsabe soye tojopasase, chora nÿetsca chë cuerpentša soyëngámna chca tsabe soye jtsebínÿnana.

²⁷Cachcá, tsëngaftanga Crístbeñe ošbuáchiyënga, cháftaca cánÿiñe mo canÿacá jtsemnëse, mo chabe cuerpca jtsemnana, y cada ona tsëngaftanguentšá mo chë cuerpentša soyëngcá, jtsemnana mo chabe cuerpentša soyëngcá. ²⁸Ntšamo Bëngbe Bëtsá cuerpentše soyënga tojancjá ndayentše inabošcá, cachcá, ošbuachiyëngcá enefjuanëngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiama abuátambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jášnana obenana bomnënga, chë ínÿëngbioye puerte ujabuáchanënga, chë inÿe ošbuachiyëngbioye amëndayënga, y chë nÿetsca biyañe jtsóyebuambnayama obenana

bomnënga, tempo ndmabiyañe.

²⁹Ndegombre, ošbuachiyëngcá enefjuanéngbeñe nyetscanga ndoñe Jesucristbe ichmónënga ntsemnana, nyetscanga ndoñe Bëngbe Bëtsabe juabna oyebuambnayënga, nyetscanga ndoñe abuátambayënga, nyetscanga ndoñe Bëngbe Bëtsabe obenana bomnënga, bëts soyënga jamama.

³⁰Nyetscanga ndoñe šoquënga jáshnama obenana bomnënga; nyetscanga ndoñe nyetsca biyañe jtsóyebuambnayama obenana bomnënga, tempo ndmabiyañe; ni nyetscanga ndoñe obenana bomnënga quemátsmëna, chë tempo ndmabiyañe nyetsca biyañe jtsóyebuambnayama obenana bomnënga ntšamo tmojtsichamcá josértama y ínÿengbioye chama jtsabuayiynayama.

³¹Pero tšëngaftangna puerte šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftšashjáchama.

Bonshánana jtsebmomnana

Y inÿe soye más, atše bochanjínÿanÿiye ntšamo šmojtsobena cabá más tšabá jtsiyenana, Bëngbe Bëtsá jtseeservénëse.

13 ¹Nderado atše stjóyebuambaye entšangbe biyañe y angelëngbe biyañe, pero ínÿengbioye ndoñe sentsababuánÿeshanëse, atše stsemna canÿa tondayama uamaná, mo nÿe canÿe metalëshe tojtsenancá, o mo nÿe canÿe platillëshcá ndoñe tšabá tontsenanëshe. ²Y atše obenana jtsebmomna Bëngbe Bëtsabe juabna jóyebuambayama y nyetsca soyëngama, y chë Bëngbe Bëtsá tempo entšanga ndoñe tonjaninÿanÿé soyënga šojtsësertana, y Bëngbe Bëtsabe nyetsca soyëngama stsetátšëmbo, y

Cristbeñe puerte stjesošbuáchiye, chca betsošbuáchemana nÿa mo chë tjashënga chamobonjoma jamama, pero ínÿenga ndoñe sentsababuánÿeshanësa, atše tondaye séntsemna. ³Y atše lempe ntšamo stsebmomncá ndbomnëjémënga stséjátaye, y ínÿengbioye stjenontréga atšbe cuerpo chamojuinÿema, pero ínÿengbioye ndoñe sentsababuánÿeshanëse, atše ndocna uámana soye ntjashjáchana.

⁴Canÿe entšá ínÿenga ababuanÿeshaná, uantado jtsemnana masque padecena soyënguiñe tmojtsemna órncá, y ínÿengaftaca tšabe ainánaca mando jtsebmomnana. Inÿenga ababuanÿeshaná ndoñe ntsántšabošana ntšamo inÿa tojatsbmomncá, ni ntšenábotamnayana, ni cachá chë ínÿengbiama más uamaná ntjätenobiamnayana; ⁵ndoñe bacá mandbomná ínÿengaftaca ntsemnana, ni nyets tempo ntsebošana y lempe jtsamana nÿe chabiamana tšabe soye jónÿenama; cha nÿe ndayámnaca ndoñe ntjetnana, ntšamo ínÿenga tmojaborlá ora jtsaperdónayana.

⁶Inÿenga ababuanÿeshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngamna aíñe. ⁷Inÿenga ababuanÿeshaná, ainaniñe añemo jtsebmomnana nyetsca padecena soyënguiñe, lempe ntšamo más tšabá yomna soyënguiñe jtsošbuáchiyana, nyetsca más tšabá yomna soyëngama jtsobátmanana, y jtsóboyayana nyetsca toto soyënga.

⁸Bonshánana nyetsca tescama jëftsemnana. Canÿe te echántsemna, chora chë Uámana Espiritu ndoñe más queochátama entšanga Bëngbe Bëtsabe juabna chamotsóyebuambnama, ni chë ndocna te ndmabiyañe chamotsóyebuambnama, ni chë puerte

jtsetatšëmbëse jóyebuambayama obenama chamotsebomnama; ⁹er ntšamo mora bënga imotatšëmbcá y Bëngbe Bëtsabe juábnaca jóyebuambayëse tmojayana soyënga, nÿe batšatema béngbioye jtsinÿanÿnayana Bëngbe Bëtsabe soyëngama, ndoñe lempe; ¹⁰pero Jesucristo chaojésabo ora, y chaojama bënga chamotsemna lempe ntšamo Bëngbe Bëtsá béngbiana yojanjuabnacá, quem soyënga, chë nÿe batšatema béngbioye jtsinÿanÿnayana Bëngbe Bëtsabe soyëngama, ya ndoñe más queochátsbinÿna.

¹¹Atše bášetema ora, sënjanoyebuambná, sënjanjuabná, y soyëngama tsábá jtsetatšëmbuamna sënjanjuabná mo canÿe basetemcá; pero bëtsá sënjanóbema orna, sentsanajbaná lempe amana mo canÿe basetemcá.

¹²Cachcá, mora bënga quem luarentšë nÿe batšatema Bëngbe Bëtsabe soyëngama jtsetatšëmbuana, mo canÿe espejuñe tmojtsonÿacá, pero ndoñe nÿa corente tsábá. Pero canÿe te bënga mochántsetatšëmbo lempe nyetsca soyëngama, bënga Bëngbe Bëtsabe delante chamojtsemna ora. Mora atše séntsetatšëmbo nÿe batšatema Bëngbe Bëtsabe soyëngama, pero chora lempe chanjuábuatmana, ntšamo Bëngbe Bëtsá corente šuabuاتمcá.

¹³Pero morna, Bëngbe Bëtsábeñe jtsošbuáchiyana, chábeñe jtsobátmanana, y chábioye y ínÿengbioye jtsababuánÿeshanana, chë soyëngna nyetsca tescama jëftsemnana; pero chentšana chë más uámana soye endmëna ínÿenga jtsababuánÿeshanana.

Ndmabiyañe obenana Bëngbe Bëtsabe tšetánana

14 ¹Bëtscá šmochtsama nyetscanga jtsababuánÿeshanëse

chašmotsiyenama, y puerte šmochtseboše jtsebomnama chë Bëngbe Bëtsabe tšetana obenana tšabe soyënga jamama; pero chentšana masna, chë Bëngbe Bëtsabe juabna jóyebuambayama obenana. ²Er chë tempo ndmabiyañe mora jóyebuambayama obenana bomná, Bëngbe Bëtsábioye jtsatsëtsnayana y ndoñe entšángbioye, er ndegombre entšanguentšë ntšamo cha tojtsoyebuambnacá ndocná ntjosértana; chana chabe espírituftaca jtsóyebuambnayana y ndoñe nÿe chabe juábnaca, chë tempo Bëngbe Bëtsá ndocna entšábioye tbonjaninÿinÿé soyëngama. ³Pero chë Bëngbe Bëtsabe juabna oyeuambnayana entšanga jtsëtsëtsnayana, chënga más chamotsošbuáchema y ainaniñe añemo chamotsebomnama, Bëngbe Bëtsabe soyëngama jábuayenama, y jamama padecena soyënguñe tmojtsemna órnaca añemo chamotsebomnama. ⁴Chë tempo ndmabiyañe mora jóyebuambayama obenana bomná, jtsamana nÿe cha más jtsošbuáchiyama y ainaniñe añemo jtsebomnama; pero chë Bëngbe Bëtsabe juabna oyeuambnayana jtsamana chë ošbuachiyëncá enefjuanënga chca soyënga chamotsebomnama.

⁵Atše séntseboše nyetsca tšëngaftanga chë tempo ndoñe šmonjanbiyañe mora jóyebuambayama obenana chašmotsebomnama, pero chama atše más séntseboše tšëngaftanga chë Bëngbe Bëtsabe juábnaca soyënga chašmotsóyebuambnama. Chë Bëngbe Bëtsabe juábnaca soyënga oyeuambnayá más uamaná jtsemnana chë inÿe biyañe oyeuambnayabiama; chca ndoñe nántsemna, ntšamo canÿe biyañe

tojayancá chë biyañe oyebuambnayá tbojtsësertánese y chë ošbuachiyëngcá enefjuanënga tojábuaenase, y chca, chë soyënga tmojouenama, chënga chamotsobena más jtsošbuáchiyama y añemo jtsebmomnama. ⁶Y mora, Jesucristbeyeca atšbe catsátanga, atše nderado tcojábuaache y ñye inye biyañe tcojábuaenese, ¿chca ntšamo chatjújabuache? Atše jtsobenana jujabuáchana, ñye ntšamo chë biyañe tijayancá átšnaca šojtsësertánese, y ndayá Bëngbe Bëtsá šojinýinýecá entšanga jábuaenama stjobenase, chë Bëngbe Bëtsá tojama atše jtsetatšëmbuama soye, chë Bëngbe Bëtsabe juábnaca stsoyebuambná soye o chë tšëngaftanga jabuátambama cha yoboše soye.

⁷Entšanga monduamana ndayánaca juénanana, mo flautëfja o arpa, vida ndbomna soyënga; cada sóyeca inyetšá juénanama ndoñe tontsopodénese, ndocná nantsobena jtsetatšëmbuama ndayá canya chë soyëngaca yojtšenanama. ⁸Y nderado nda trompetëfjua tojuájatëta ora, soldadënga japéliama chamoprontama, chë uajatëtaná inyetšá, ñya chama ndoñe tonjuájatëtëse, ndocná buanjoserá y jempéliama ndoñe nanjoprónta. ⁹Tšëngaftangaftácnaca cachcá jtsopasánana. Inyënga paselo josértama jobenaycnana tšëngaftanga ndoñe šmonjóyeuambase, ndocná queochátstatšëmbo ntšamo šmojtšichamcá. Nántsemna mo ñye cánýënga cuaftsoyeuambnacá. ¹⁰Atše sëntsejuabná, ndegombre quem luarentše ba inye biyañe entšanga imnëtsoyeuambnayana, y ndaye biyáñnaca tmojoyebuambá ora, sempre jtsemnana ínýënga ntšamo chënga tmojtšichamcá osertánënga. ¹¹Pero ntšamo inya chabe biyañe šojauyancá

atše ndoñe šontsësertánese, atše stsemna canye chabiama ndosertana biyañe oyebuambnayá, y chánaca cachcá atšbiamá. ¹²Chcasna, chë Uámána Espiritu šondinýanýná obenana jtsebmomnama tšëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngacñama, chë ošbuáchiyënga más jtsošbuáchiyama y añemo jtsebmomnama inétsama obenana.

¹³Chíyeca, chë tempo ndmabiyañe mora jóyeuambayama obenana tojtsebmomná, Bëngbe Bëtsá chabotseimpadana, cha chaoma ntšamo chë inye biyañe tojayancá chabosertama y ošbuáchiyënga jábuaenama obenana chaotsebmomnama. ¹⁴Pero atše Bëngbe Bëtsáftaca stjencuénta, chë ndmabiyañe jóyeuambayama cha obenana šojanatšetacá jtsóyeuambnayëse, atšbe espíritu cháftaca nantsóyeuambnayë, pero atšbe juabna ndoñe ntsetatšëmbuana ntšamo chë espíritu tojtsoyeuambnacá. ¹⁵Y asna, ¿ntšamo atše chtsemána? Bëngbe Bëtsáftaca chanjencuénta atšbe espírituca, pero ntšamo stsichámuama jtsejuabnayësnaca. Bëngbe Bëtsá jëtšchuayama chanjavérsia atšbe espírituca, pero chca chanjama chíñnaca jtsejuabnayëse. ¹⁶Nderado aca Bëngbe Bëtsá cojtsatschuaná ñye espírituca, y canya quem Bëngbe Bëtsabe tšetana obenanama ndosertaná tcmojóyeunase, cha ndoñe ntsobenana jayanana “chca chaotsemna ca”, cach aquécá cha yojtsejuabnama jinýinýiyama, er ntšamo cojtsichamcá cha ndoñe ntsësertánana. ¹⁷Aca jtsobenana chca puerte tšabá Bëngbe Bëtsá jëtšchuayana, pero ntšamo tcojtsamcá

ndoñe ntjamana inya ndaye tšabe soye chaotsebomnama. ¹⁸ Atše, Bëngbe Bëtsá sentsatschuaná inye biyañe jóyebuambayama tšëngaftangbiama más tsobenama; ¹⁹ pero Crístbeñe ošbuachiyëngcá tmojënefjna ora, atše más sëndbétseboše nye mo shachna palabratémnaca jóyebuambayana, chënga añe catafjosertacá, chca, ínÿenga jabuátambama, y ndoñe bnëtsana uaranga palabrenga jatóyebuambnayana inye biyañe, chënga chaósertama ndoñe tontspodénese.

²⁰ Jesucristbeyeca atše catsátanga, šmochtsajbaná basetemëngcá juabnayana. Mo šešonatemëngcá šmochtsemna, bacna soyënga jamama ntsetatsëmbcá; pero mo bëtsëtsangcá tšabá šmochtsejuabnaye. ²¹ Bëngbe Bëtsabe uabemana palabrenguiñe, Bëngbe Utabná mëntsá tojánayana:

Atše quem entsángbiyoye
chanjáuyana,
ínÿenga inye luarëngocana
ashjajnëngaftaca, chëngbiama
canÿe ndosertana biyañe
oyebuambnayënga;
y chanjáuyana ndayá chëngbe
biyañe chamojtsichamo
soyëngaca;
pero ni chca, chënga ndoñe
quešmochatóyeunaye ca.

²² Chcasna, inye biyañe jóyebuambayama obenana jtsebomnana endmëna, Bëngbe Bëtsá ndayánaca chë chábeñe ndošbuachiyëngbiyoye jinÿanÿiyama, y chábeñe ošbuachiyëngbiyoye ndoñe. Pero, Bëngbe Bëtsabe juabna jóyebuambayama obenana jtsebomnana endmëna, Bëngbe Bëtsá ndayánaca chábeñe ošbuachiyëngbiyoye jinÿanÿiyama, y chábeñe ndošbuachiyëngbiyoye

ndoñe. ²³ Er tšëngaftanga nÿetscanga ošbuachiyëngcá šmojënefjna ora, nÿetscanga ba biyañe šmojtsoyebuambná, y choye tojámashëngo canya chca Bëngbe Bëtsabe tšetana obenanama ndosertaná o chábeñe ndošbuachiyá, cha nanjájuaboye tšëngaftanga opënga šmojtsóbema ca. ²⁴ Pero nÿetscanga tmojtsichamo, Bëngbe Bëtsabe juábnaca jtsóyebuambnayëse, y choye tojámashëngo canya Bëngbe Bëtsabeñe ndošbuachiyá o canya chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosërta; y chë soye cha bochanjayëñjaná cha bacna soyënga tojamama, y ndayá cha tojamiñe corente echántsejuabnaye, ntšamo nÿetscanga tmojtsichámuama.

²⁵ Y Bëngbe Bëtsá chábiyoye bochanjinÿinÿiye ntšamo cha ainaniñe tojajuabó y tojabošencá, ndayá ndocnábiyoye tbonjinÿinÿecá, y cha echanjoshëntsamentšiyoye Bëngbe Bëtsá jadórama, y tšëngaftangbe delante echanjayana Bëngbe Bëtsá ndegombre tšëngaftangbeñe yojtsemna ca.

**Ošbuachiyëngcá šmojënefjna
ora, ntšamo tšabá yomncá
lempe šmochtsama**

²⁶ Chcasna, Jesucristbeyeca atše catsátanga, šmojënefjna ora, cada ona ndayánaca jtsebomnana nÿetscangbiama: ínÿengna jtsobenana javërsiama, Bëngbe Bëtsá jëtschuayama, ínÿengna jtsobenana jabuátambana o jábuayenama ndayá Bëngbe Bëtsá tojinÿanÿecá, o tempo ndmabiyañe chora jtsóyebuambnayana, o entsanga jábuayenana ntšamo inya inye biyañe tojayancá. Pero lempe šmochjama, ošbuáchiyënga más chamotsošbuáchemay

más añemo chamotsebomnama Cristo jaserviama. ²⁷Nderado inÿe biyañe jóyebuambayama tojtsemnëse, útata o nÿa másese únganga chca chamoyebuambá, y canÿánÿa; y jtseytana ndánaca ntšamo tmojtsichamcá chabosertá y nÿetscanga chama chauabuayená. ²⁸Y chca chabosertama y nÿetscanga jábuayenama ošbuachiyëngbeñe ndocná tontsemnëse, as ošbuachiyëngcá chamojénefjna ora chë chca oyeubuambnayá bontsemna ndoñe chca biyañe ntsóyebuambnayana, sinó nÿe canÿa tojtsemna ora cha jtsobenana chca Bëngbe Bëtsáftaca jencuéntana. ²⁹Utata o únganga entsamna jayanana soyënga, Bëngbe Bëtsabe juábnaca jtsóyebuambnayëse; y chë ínÿenga jtsamnana botamana jajuaboyana y jayanana ntšamo chënga tmojayancá aíñe o ndoñe Bëngbe Bëtsábiocana tayojsóbocanama. ³⁰Pero canÿa Bëngbe Bëtsabe juabna tojtsóyebuambnantscuana, inÿa chentše ouenana tbemanábioye Bëngbe Bëtsá tbojinÿinÿé ndayánaca yojtsebomna jayanama, as chë natsana oyeubuambnayá iytëca chaóbema, y chabolesenciá chë inÿa chaóyebuambama. ³¹Chca, nÿetscanga, canÿánÿa jtsobenana jayanana soyënga, Bëngbe Bëtsabe juábnaca jtsóyebuambnayëse, nÿetscanga chamuatsjínÿama y nÿetscanga añemo jatšatayama. ³²Chë Bëngbe Bëtsabe juabna oyeubuambnayá endobena jtsemándayana ntšamo tojtsichamcá, cha cachabe espíritoca tojtsoyebuambná ora; ³³er Bëngbe Bëtsá endmëna nda inétsama bënga natjëmbana chamotsiyenama, y ndoñe chë bënga nÿetscanga cachcá ndoñe chamondëtsejuabnama, y nÿe ntšamo cada ona tojtsebošcá chaotsamama.

Ntšamo nÿets luarënguenache, chë ošbuáchiyënga, chë Bëngbe Bëtsabe entsanga mondbénéfjna luarënguenache endbetsemncá, ³⁴tšëngaftangbéntsnaca, shembásenga entsamna iytëca jobiamëngana, ošbuachiyëngcá šmojénefjna ora, er ndoñe quenátslesenciana chënga chora chamuátoyebuambnama, y aíñe chënga entsamna chëngbe boyanga jtsayaunanana, ntšamo Moisesbe leyinë endayancá. ³⁵Chënga ndayánaca jtsetatšëmbuama tmojtsebošëse, cachëngbe boyángbioye yebnoca chamotjanga; er ndoñe corenta tšabá ntsemnana canÿe shembása jtsóyebuambnayana tšëngaftanga ošbuachiyëngcá šmojénefjna ora.

³⁶¿Tšëngaftanga šmojatsjuabná, Bëngbe Bëtsabe tšabe noticiënga tšëngaftangbeñe tojanobojatšé ca, o nÿe tšëngaftanga chë soyënga šmojanóyëngacñe ca? Ndegombre ndoñe chca; chíyeca tšëngaftanga nÿe cánÿenga ndoñe ntsoebenana jayanama ndayá jamama cmojtsamnama. ³⁷Nda tojtsejuabná cha Bëngbe Bëtsabe juabna oyeubuambnayá yomna ca, o chabe ainaniñe chë Espíritu jtsemándayama yojtsebomna ca, cha bontsemna tšabá jtsetatšëmbuana, ntšamo Bëngbe Utabná šojamandacá atše stsabiamnama. ³⁸Pero cha ndoñe chca tontsetátšëmbo y chca ndoñe yondmëna ca tojayanëse, ndayá cha tojayancá ndoñe šmatjóyëngacñe.

³⁹Chcasna, Jesucristbeyeca atšbe catsátanga, puerte šmochtseboše Bëngbe Bëtsabe juábnaca soyënga jtsóyebuambnayama obenana jtsebomnama, y ndoñe šmattsama chë tempo ndmabiyañe ínÿenga ndoñe chamondëtsóyebuambnama; ⁴⁰pero lempe šmochjama ntšamo jamama yomncá, y ndoñe nÿe ntšamo cada ona tojatsjuabnacá.

Cristo tojtanayenama

15 ¹Morna, Jesucristbeyeca atšbe catšátanga, atše séntseboše tšëngaftanga chašmuatenójuaboma atše tcbonjanabuayená tšabe noticiënguine, ndayá tšëngaftanga šmonjanóyëngacñe, chë ndáyeca tšëngaftanga Jesucristbeñe šmojtsošbuaché y cha jtseservënëse šmojtseyena. ²Chca šmobómnyeca, tšëngaftanga atsebácanënga šmojtsemna, pero tšëngaftanga sempre chiñe šmojtsošbuachese, ntšamo cbonjanabuayiyinacá; chca ndóñesna, nýe ndoñe corente tšabá ntjajuaboycá chë buayenana soyënguine šmojtsošbuaché.

³Er atše tšëngaftangbeñe sënjëftsanboshjona, Bëngbe Bëtsábiocana atše tijanóyëngacñe más uámana buatëmbana soyënga. Atše tcbonjabuatambá: Cristo tojanóbana bënga bacna soyënga tmojamama, ntšamo Bëngbe Bëtsabe uabemana palabrënguine chabe juabna oyebuambnyënga chama tmojanayancá; ⁴chë Cristo tmojanatbontsá y unga tianoye cha cháuatayenama Bëngbe Bëtsá tojanmama, ntšamo Bëngbe Bëtsabe uabemana palabrënguine chabe juabna oyebuambnyënga chama tmojanayancá; ⁵chë Pédrëbioye tbojánebëbocnama, y chentšana chë bnétsana útata ca uabobáinëngbioynaca. ⁶Chentšana mo shachna patsama más chábeñe ošbuáchiyënga tojánebëbuacna, chënga cánýentše imojtsemna ora; chënguentšanga banga cabá vida imotsóbmñe, masque báseftanga ya tmojóbana. ⁷Chentšana Santiágbioye tbojánebëbocna, y chentšana nýetsca chabe ichmónëngbioye.

⁸Y chentšana átsnaca šonjánebëbocna. Mo canýe šešona cabá shbená tojonýnacá, Cristo chabe ichmoná šonjábema, chë tempo chama jopróntama ntsebmncá, ndayëntscuana ínýenga cha tojanabuatambá. ⁹Er atše sëndmëna chë más batšá uamaná Jesucristbe ichmónëngbeñe; y ni mercedo taitsatobuajoñe “chabe ichmoná ca” chašmotsábobuatmama, er atše tša sënjánama Jesucristbeñe ošbuáchiyënga chamotsesufrínama. ¹⁰Pero Bëngbe Bëtsá atšbe tšabiama yojanjuabná, y chíyeca atše mora tsmëna ntšamo sëndmëncá, y chabe tšabe juábnaca atšbiana jtsamana, ndoñe nýe bonamente quenátsmëna. Er atše más sënjatrabajá, chë inýe Jesucristbe ichmónëngbiama; pero ndegombre atše ndoñe nýe canýa chca chiyatsma, sinó masna Bëngbe Bëtsá chë trabajo tojama, tšabe juabna atšbiana jtsebmñese. ¹¹Ndayá más yojtsámana ndoñe quenátsmëna, atše o chënga, Jesucristbe soyëngama abuayinyayine más tojatrabajá, sinó ndayá chë soyënga bëngbe buayenana soye yojtsemna, y tšëngaftanga chiñe šmojtsošbuaché.

**Chë obanënga cachiñe vida
mochtsatsbomnama**

¹²Pero bëngbe buayenana soye endmëna, Bëngbe Bëtsá tojanma Cristo cháuatayenama; as čndáyeca básefta tšëngaftanga šmnétsichamo Bëngbe Bëtsá ndoñe yochanjama chë mora obanënga chámuatayenama ca? ¹³Pero chca tojtsemna, chë obanënga ndoñe mochántayenasna, Cristo cach ndoñe tontanayena; ¹⁴y Cristo ndoñe matenjésayenëse, bënga nýe bonamente chabiama fstsabuayinyá, y tšëngaftanga nýe

bonamente chábeñe šmojtsošbuaché.
¹⁵ Y canye más bêts soye: chca tojtseñsna, bēnga muanjábozna mo chē Bēngbe Bětsabiana soyēnga tmojinjē ca ichamēngcá, pero ndoñe ndegombre chca tontsemna; er bēnga fsēndbėtsichamo, Cristo cháuatayenama Bēngbe Bětsá tojanma ca. Pero chē obanēnga ndoñe mochántayenasna, Bēngbe Bětsá ndoñe tonjanma Cristo cháuatayenama. ¹⁶ Pero chē obanēnga ndoñe mochántayenasna, Cristo cach ndoñe tontanayena. ¹⁷ Y Cristo cháuatayenama Bēngbe Bětsá ndoñe matēnjanmēse, tšēngaftanga nje tondayama chábeñe šmojtsošbuaché; tšēngaftanga chē bacna soyēngama cabá ndoñe perdonánēnga šmontsemna. ¹⁸ Y chca, chē tmojanóbanēnga, Crístbeñe ošbuáchiyēnga, chēnga cach ndoñe chēngbe bacna soyēnguentšana atsebácanēnga quemochátsmēna, sinó njetzca tescama castigánēnga. ¹⁹ Bēnga tmojtsobatmana Cristo bēngbiana tšabe soyēnga chaotsamama, pero chca nje quem luarentse bēnga vida tmojtseboñnētsuana, as bēnga njetscangbiana más muantsomerecena, njetscanga bēngbiana chaotsangménama. ²⁰ Pero chca ndoñe ndegombre quenátsmēna, er ndegombre Bēngbe Bětsá tojanma Cristo cháuatayenama. Mo chē uanatsena shajuancá, jtsinjanjāyayana más shajuanēnga chentšana yochjóboznama, cachcá, Cristo tojtāyayana ora, cha tojaninjanjē Bēngbe Bětsá yochjanma ínēnga chábeñe ošbuáchiyēnga chámuatayenama vida chamotsatsboñnama. ²¹ Chca, ndayá canye entšá, Adán, tojanmama, njetscanga jóbanama yojtsamna, cachcá, ntšamo inje entšá, Cristo, tojanmama,

Bēngbe Bětsá yochjama entšanga chámuatayenama. ²² Er ntšamo, Adánbentšana entšanga bėtsemnayeca jóbanama jtsamnana, cachcá, Crístbeñe ošbuáchiyēnga bėtsemnayeca, Bēngbe Bětsá jamana chē njetzca tescama yomna tšabe vida chēnga chamotseboñnama. ²³ Pero Bēngbe Bětsá jamana cada ona cháuatayenama nja chama tempo tojtsemna ora. Natsana Cristo, y chentšana, Cristo cachiñe quem luaroye chaojésabo ora, njetscanga chē Crístbe entšanga imonñēnga. ²⁴ Y chentšana, Bēngbe Bětsá chē Taitábioye, Cristo chabe amēndayana chabojantšabuaché ora, njetzca mandadēnga, mando y obenana bomñēnga corente jtsayēnjanayēse. ²⁵ Er Cristo bontsemna ínēnga mo reycá jtsamēndayana, chabe uayayēnga chabe cucuatšiñe chamoquedama Bēngbe Bětsá tojamēntscuana. ²⁶ Canye uayayá inétsama entšanga jóbanama; pero Cristo último echanjama chabe obenana pronto chaotsopochocama. ²⁷ Er ntšamo Bēngbe Bětsabe uabemana palabreñguñe endayancá: “Bēngbe Bětsá tojama Cristo njetzca soyēnguiñe chaotsemándama ca.” Pero “tojama Cristo njetzca soyēnguiñe chaotsemándama ca” tojayana ora, jtsopodénana puerta tšabá jinjāma, chca ndoñe yontsayana, Bēngbe Bětsá Crístbeyeca mandaná yojtsemna ca; Bēngbe Bětsá nda tojanma Cristo njetzca soyēnguiñe chaotsemándama. ²⁸ Y Cristo njetzca soyēnguiñe chaojtsemándama ora, cach Cristo, chē Uaquiñá, echántsemna Bēngbe Bětsábeyeca mandaná, Bēngbe Bětsá chē Cristo njetzca soyēnguiñe chaotsemándama tojanmá. Y chca, Bēngbe Bětsá lempe echántsemna, lempe ntšamo quem luarentse yobínjñiñe.

²⁹Inyetsánaca, báseftanga cachiñe uabáinenga imojtsemna, chë ošbuáchiyënga nduabáinënga obanëngbe cuenta. Chca chënga jamana mo chë obanënga uabáinënga chamotsemnana cuafjamcá. Chë obanënga chámuatayenama ndoñe tontsemnëse, ñndáyeca entšanga chëngbe cuenta muantenábye?

³⁰Obanënga chámuatayenama Bëngbe Bëtsá ndoñe tonjamëse, ñndáyeca bënga muántseprontana nyets tempo resjuiñe jtsajnama, Cristbiama oservenana causa? ³¹Atšbiama cada te resjo endmëna jóbanama. Jesucristbeyeca atšbe catšátanga, atše séntichamo, chca ndegombre yómnyeyeca, atše oyejuayá stsemnana, mo Cristo Jesús Bëngbe Utabnabe canye oservenacá, tšëngaftanga chábeñe šmojtsošbuáchema. ³²Mo canya tšátjaye bayëngaca tojtsentsjaná orcá, atšbiama puerte resjo enjamna jóbanama, Efeso pueblaca; pero nyë chë entšanga mondbëtsejuabnaye jëftsashjáchama soyënga jtsebošëse chca matsjamnëse, ñndaye tšabe soye matëñjanóbocna, chca atšbiama resjo jóbanama enjamna ora? Obanënga ndoñe mochántayenëna, mochtsama ntšamo entšanga jayanana monduamancá: “iMochjase y mochjofsiye, nderado yëfse muatjóbanaca!”

³³Ndoñe matenoíngñana. Ntšamo canya tojanayancá: “Nderado nda bacna amiguëngaftaca tojtsenutaná, cha jtsajbanana chë tšabe soyënga, ntšamo jtsamëse vojoyena.” ³⁴Tšabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayenaca juabnaye causa, er báseftanga tšëngaftanguentšë Bëngbe Bëtsabe

soyënga ndoñe quešmatábuatma. Atše chca séntichamo tšëngaftanga chašmotsëuatjama.

Ntšamo chë obanënga mochtayena

³⁵Pero nderado nda nanjatjaye: “¿Ntšamo chë obanënga mochtayenaca? ¿Mocna cuerpo mochtsebmocna ca?” ³⁶iJuabna ndbomna entšá! Ndayá tcojajé orna, jtseytana chë jénaye chaóbanama, chë matatema vida chaotsebmocnana. ³⁷Ndayá tcojajecá ndoñe ntsemnana chë juábocnana matatema, ndayá nyë chë meshe, trigo meshe o ndaye mata méshnaca jtsemnana. ³⁸Pero Bëngbe Bëtsá jamana chë jénayentshana mata chauábocnana, ntšamo jamama cha tojajuabocá; y cha jamana cada jénayentshana canye mata chauábocnana, ntšamo chë jénayentshana chauábocnana tojtsemncá. ³⁹Nyetsca cuerpënga ndoñe cachcá ntsemnana. Entšanga canye cuerpo mondbomna, bayënga inye cuerpo, shloftšënga inye cuerpo, y beongna inye cuerpo. ⁴⁰Chë celoca vida bomnënga inyetsá jtsinñana, y chë quem luarentšë vida bomnënga inyetsá. Pero chë buashinñinñana y botamanana ntšamo celoca vida bomnënga jtsinñancá, ndoñe cachcá ntsemnana chë quem luarentšë vida bomnëngbe botamanancá. ⁴¹Cachcá, shinñe ndoñe quenátsbmocna cachca buashinñinñana juashconcá, ni estrellëngcá; y estrellënguentsë cach ndoñe cachcá ntsebuashinñinñana. ⁴²Cachcá, chë obanënga chámuatayenama Bëngbe Bëtsá chaojama ora chamojtsebmocna cuerpo, ndoñe queochátsmëna cachcá ntšamo quem luarentšë imojaniyena ora imojëftsebmocna cuerpcá. Ntšamo chë jénaye tcojuatbontsá ora chiye

jóbanana, cachcá, quem luarentse bēnga mondbomna cuerpo jóbanana, ínŷenga juatbontsana y jtsoepochócana; pero bēnga chámuatayenama Bēngbe Bētsá chaojama ora, bēnga tsēm cuerpo mochántatsbomna y ndocna te queochatopochóca. ⁴³ Chē óbana cuerpo tmojuatbontsá ora, chē cuerpo tondaye ntsámanana; pero chē obanēnga chámuatayenama Bēngbe Bētsá chaojama ora, chē tsēm cuerpo puerte echántsebuashinŷinŷana y echantsámana. Bēnga quem luarentse imoyenēntscuana imobomna cuerpo, nŷe batšá obenana jtsebmomna; pero chē Bēngbe Bētsá šochjatšataye tsēm cuerpo, puerte obenana bomna cuerpo echántsemna. ⁴⁴ Quem luarentse imobomna cuerpo endmēna cam luarentse vida chaotsebmomna; pero bēnga chámuatayenama chaojama ora, chē bēnga mochtsebmomna tsēm cuerpo, puerte chē Espíritbeyeca echántsemandana. Canŷe cuerpo quem luarentse vida chaotsebmomna yómnayeca, canŷe cuerpēnaca, jtsemnana celoca vida chaotsebmomna.

⁴⁵ Chca Bēngbe Bētsabe uabemana palabrenguiñe endayana: “Bēngbe Bētsá, chē natsana entšá tbojanma chaotsainama ca.” Adánbentšana nŷetsca entšanga jabocanana, pero Crístbeyeca, Bēngbe Bētsá tojama banga mo tsmēma entšangcá chamotsemnana; chca, Cristo jtsemnana mo chē ústonoye Adancá; pero Cristna canŷe espíritu endmēna, y chē espíritu jamana entšanga chē nŷetsca tescama yomna tšabe vida chamotsebmomna. ⁴⁶ Pero chē celoca nŷetsca tescama vida jtsebmomna cuerpna ndoñe natsana ntjóbcnana, ndayá chē quem luarentse vida jtsebmomna cuerpo; chentšana chē

celoca vida jtsebmomna cuerpo. ⁴⁷ Bēngbe Bētsá, chē natsana entšá tbojanma fshántseca, y chca, cha fshantsentšana tojánbocna; Cristna, mo entšangbentšana chē natsaná tsmacá bemanacá, celocana tojánbocna. ⁴⁸ Adánbentšana, chē natsana entšá, chē fshántseca tmojanmábentšana tmojábcanēnga, ntšamo cha yojamncá jtsemnana. Cachcá, chē mo tsmēmangcá tojábiámēngna, Cristcá jtsemnana; Cristo nda celocana tojánabo.

⁴⁹ Ntšamo bēnga jtsinŷnana chē Bēngbe Bētsá fshántseca tbojánbema entšacá, cachcá bēngnaca mochtšinŷna ntšamo chē celocá yomnacá.

⁵⁰ Jesucrístbeyeca atšbe catšátanga, atše cbochjáuyana, nŷe quem luarentse vida jtsebmomna cuerpēngaca, bēnga ndoñe ntsoobenana Bēngbe Bētsabe amēndayoye jamashēnguana; ni ndayá yochjopochóca soye, ntsoobenana ndayá ndoñe yochanjopochóca soye jtsebmomna. ⁵¹ Šmochjouena, atše canŷe soye cbochanjáuyana, y chē soye Bēngbe Bētsá entšanga tempo ndoñe tonjaninŷanŷé: Bēnga ošbuáchiyēnga nŷetscanga ndoñe quemochatóbana, pero Bēngbe Bētsá šochanjátrocaye mo tsmēmangcá. ⁵² Nŷe betesco, mo tcojofshetá y cachora tcojtafšnacá, quem luare ya jopochócama ora, canŷe ángel trompetéfjua chaojuájetá ora, er chora trompetéfjua echanjuénana, Bēngbe Bētsá echanjama obanēnga chámuatayenama, nŷetsca tescama vida jtsebmomna; y bēnga, chē ainēnga mochtsebmōngna, cha šochanjátrocaye mo tsmēmangcá jtsemnana; ⁵³ er jtseytana Bēngbe Bētsá chaotrocá chē bēngbeñe jopochócama yomna soye, ndocna te yochanjopochóca soyiñe; y ndayá bēngbeñe yochjóbana soye, ndocna

te yochanjóbana soyiñe. ⁵⁴ Bëngbe Bëtsá chca bëngaftaca chaojama ora, chë cha jatrócana ndayá bëngbeñe yochjopochocacá, ndocna te yochanjopochóca soyiñe, y ndayá bëngbeñe yochjobancá, ndocna te yochanjóbana soyiñe, chora echanjochñengo ntšamo Bëngbe Bëtsabe uabemana palabrënguñe chama endayancá:

Bëngbe Bëtsá tojayënjaná chë entšanga chamóbanama endbëtsama obenana; entšanga ndoñe más quemochatóbana ca.

⁵⁵ ¡Mora entšanga chamuatóbanama chaotsama obenana ya ndoñe quenátsmëna;

Bëngbe Bëtsá chë obenana nyetsca tescama tojayënjaná ca!

⁵⁶ Entšanga bacna soyënga tmojama causa, obenana endmëna entšanga jóbanama chaotsamnama. Ndayá leyíñe iuayanama, entšá jtsetatšëmbuana ndayá yomna bacna soyënga jamana, y chca tátšëmbo causa, chca bacna soyënga jamama juabñëngaca mandaná jtsemnana, y cabana, jóbanama jtsemnana. ⁵⁷ ¡Pero Bëngbe Bëtsá mochtsatschuanaye, bënga mo ayënjanayëngcá cha šojábiamama, er ya ndoñe šontsamna chca jtsemnana, chë Bëngbe Utabná Jesucristo bëngbiamama tojanma sóyeca!

⁵⁸ Chíyeca, Jesucristbeyeca atšbe catšátanga, atšbe bonshánënga, Jesucristbeñe sempre puerte šmochtsošbuáchiye y ndocna te šmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentšëna bëtscá jtsamana Bëngbe Utabnabiamama trabájayíñe, er tšëngaftanga šmondétatšëmbo, Bëngbe Utabnabiamama trabájayíñe ndayá

šmojamcá, ndocna te nyë bonamente ntsemnana.

Jerusalenoca ošbuáchiyëngbiamama crocenánama

16 ¹ Mora chanjóyebuambaye chë Jerusalenoca Bëngbe Bëtsabe entšanga ndbomñëjmëngbiamama tšëngaftanga šmochjuíchmua crocenánama. Atšë sëntsebošë tšëngaftanga chca chašmoma ntšamo chë Galacia luaroca ošbuachiyëngcá enefjuanenache chama atšë sënjanabuayenacá. ² Cada tmengo, cmontsamna batšá crocénana jaluárana ntšamo chë semaniñe šmojonýencá, y šmochtsejuabaye; chca atšë choye chajjá ora, ndoñe chacmondétsamna quem uajabótama chora crocénana játatbanayana. ³ Y atšë choye chajjáshjango ora, Jerusalenoye chjichamuá chë tšëngaftanga mo tšabengcá šmojubuáyana entšanga, chë Jerusalenoca ošbuachiyëngbiyoe tšëngaftangbe crocénana chámuayentšbuachema, y tsbuanachangá chanjúyentšbuachiye ndayá imojtsamama chënga jábuayenama. ⁴ Y nderado, átšnaca chëngaftaca jama tšabá tojtsemnëse, chënga átšëftaca chamua.

Ntšamo Pablo yojanjuabná chë luarëngoye jama

⁵ Atšë sëntsejuabná tšëngaftangbiyoe jama jautšëtsayama, Macedonia luarëjana chajjachñëngüentšana, chentšä ošbuáchiyënga jaftsanyëse, er atšë sëntsejuabná natsana Macedonia luaroye jéftšana. ⁶ Nderado baseftayté tšëngaftangbeñe chašúetsetjana, o nderádose nyëts uaftena tempo; as tšëngaftanga inyë luaroye játama chašmuájabuachama, ndémoye jama chašojtsemnoye. ⁷ Atšë ndoñe

quetsátsboše nÿe betscó tšéngaftanga jáftsanÿana, er atše sentsobátmana más bayté tšéngaftangbeñe jajtsemnana, Bèngbe Utabná chca šojalesenciase. ⁸ Pero Efesoca šochanjajétana Pentecostés fiesta chaojobuáchèntscuana. ⁹ Er Bèngbe Bètsá tojama atše jobenayama muentše chë tšabe noticièngama banga jábuayenama, y chíyeca banga Crístbeñe montsošbuaché; pero bángnaca atšbe contra montsemna.

¹⁰ Timoteo tšéngaftangbiöye chaojase, yejuana šmochtsantješna cha tondayama chaondétsauatjama, tšéngaftangbeñe tojtsemnéntscuana, er cha Bèngbe Utabnabiamá endëtrabája, ntšamo atše sèndamcá. ¹¹ Chcasna, ndocná chábioye chabondétsáboyènja. Bètsá šmochjama cha natjémbana átšbioye chauatábama, er atše cha sentsobátmana, chë ínÿenga muentše Crístbeñe ošbuáchiyèngaftaca.

¹² Y Jesucrístbeyeca bèngbe catsáta Apólosna, atše bètscá cha sènjaimpadá, chë Jesucrístbeyeca catsátanga tšéngaftanga jányama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

Pablo chénga jtadiósoftanama

¹³ Sempre šmochtsenocuedana chë Bèngbe Utabná ndoñe chašmondétseservenama tojtsama soyèngama. Nÿets tempo, Crístbeñe y chabe soyènguñnaca šmochtsošbuáchiye. Ainaniñe puerte añemo šmochtsebomna, y bètscá šmochtsama Bèngbe Bètsabe obenáca. ¹⁴ Y nÿetsca soyènga ntšamo chašmojtsamcá, bonshanánaca šmochtsama.

¹⁵ Jesucrístbeyeca atšbe catsátanga, tšéngaftanga šmondétatšëmbo,

Estéfanás y chabe pamíllanga chë natsanènga monjamnama Jesucrístbeñe jtsošbuáchiyama, Acaya luaroca, y bètscá imojtsentšena Bèngbe Utabnabiamá jtsetrabájayana, chabe entšanga jtsèjabuáchanèse. ¹⁶ Atše cbaimpadá, tšéngaftanga lempe šmochtsama ntšamo cmojtsamèndacá, chca entšanga mo tšéngaftangbe uanatsanèngcá, y ntšamo nÿetsca chë ínÿenga mo bèngcá quemuiñe uajabuáchanèse trabájayènga cmojtsamèndacá.

¹⁷ Atše tša oyejuayá sèntsemna tšéngaftangbe pueblèšana Estéfanás, Fortunato y Acaico moye tmojášhjajnama, er atše sentsobena oyejuayá chéngaftaca jtsemnana, tšéngaftangaftaca choca jtsemnana cabá ndoñe sèntsobenèntscuana. ¹⁸ Er chénga átšbioye tmonjabo y tšéngaftangbiama šmonjauyana, y chca chénga tmonjama, atše y tšéngaftanga natjémbana ainánaca chamotsomñama. Chénga šmochtsétabna mo puerte uámána entšangcá.

¹⁹ Asia luaroca ošbuachiyèngcá enefjuanènga cmontsachuaná. Aquila y Prisca y chatbe yebntšè mondbétsenefjuana ošbuachiyènga cmontsachuaná, Bèngbe Utabnábeñe ošbuachiyèngcá, tšéngaftangcá bétsemnayeca. ²⁰ Muentša ošbuachiyènga nÿetscanga cmontsachuaná. Nÿetscanga šmochjenchuaye mo Jesucrístbeyeca catsátangcá, jtenámochèse, ntšamo cach tšéngaftangbe pamíllanga puerte bonshanánaca šmondétsachuanaycá.

²¹ Quem palabrénga tšéngaftanga jacheuyama cach atšbe cucuátšeca sèntsabiamná.

²² Nderado nda Bèngbe Utabnábioye ndoñe tbontsebobonshana, Bèngbe Bètsá nÿetsca tescama chabocastigá. ¡Bèngbe Utabná cachiñe cochjésabo!

²³ Atše, Bëngbe Bëtsá
séntseimpadana, Bëngbe Utabná
Jesús chaoma tšëngaftangbeñe
tšabe bendicionënga chaotsemnana.

²⁴ Atše, nÿetsca tšëngaftanga
cbondábabuanÿeshana, canÿa mo
tšëngaftangcá, Cristo Jesúseftaca
cányiñe mo canÿacá jtsemnëse.